

# REPELESIN

## Jon Day Niñiy Tikak

### Minim Nind Niņep

Jon nuk bi Jiysis minim dand amemb bap. Baybol buk day kisen tikyak ak, Jon minj keykey onep mamind ak tikak. Minj tikak kun gok mey, Jiysis minim tep Jon ak tikiy; minj 1 Jon, 2 Jon, 3 Jon tikiy; minj Repelesin apun biy tikiy gak. Pen minj Repelesin tikak kun biy, nuk Gor minim aņgņi dand amek, nup kalambis ay dam miņmon Patmos niņing timb kus gak ak ayey mindakniņ, Gor tap kisen giniņgamb gok biynimb mankumb biy niņyan aņgiy, day yomek niņiy tikak.

### Minim Ar Keykey Mindip Rek:

Minim nind aņgak ak mindip, chapta 1:1-8.

Krays Jon nup day yomek niņak rek, biynimb Gor ker mindyņgipay miņmon onep ar ak minj keykey tikak minim ak mindip, chapta 1:9–3:22.

Minj day day komiy miņ onep ar ak tiwningrimbikyak minim ak mindip, chapta 4:1–8:1.

Biykul onep ar ak keykey pungey, tap gak gok minim ak mindip, chapta 8:2–11:19.

Ñom nim ak sek, tap ayndik omiņal ak sek minim ak mindip, chapta 12:1–13:18.

Day niņak minim gunap tikak ak mindip, chapta 14:1–15:8.

Gor miluk niņiy miker onep ar ak yokniņgamb minim ak mindip, chapta 16:1-21.

Gor Babilon kuyip timey giy; Seytan, tap ayndik, bi Gor minim yesek aņgep gok sek, Gor yip penpen giy, kuyip taw achip achip giniņgamb minim ak mindip, chapta 17:1–20:10.

Gor kor yomb kisen niņniņgamb minim ak mindip, chapta 20:11-15.

Semb biyoņ sek, mankumb biy sek key kisenimb ay, Jerusalem kisenimb ak semb biyoņ nimb mankumb biy apek day niņak minim ak mindip, chapta 21:1–22:5.

Minim aņg jiwning minim aņgak ak mindip, chapta 22:6-21.

---

**1** <sup>1</sup> Minim tiksi piyn kun biy, nind misej ma niŋyak. Yand Gor nup woŋg giñimbiyn rek, biynimb nup direp gipay gok, ñin maŋ mindip giniŋgamb rek niŋyaŋ aŋgiy, Ñinuk Jiysis Krays nup gos ñek, enjol nuk ak yokek apiy gek, day niŋnik. <sup>2</sup> Day niŋnik kun ak, Gor minim gunap, Jiysis Krays kisen giniŋgamb rek, minim junj gunap niŋiy mey, nimbip aspiyn. <sup>3</sup> Maŋ mindip: day niŋnik rek, kiñiŋ giy gi dand amniŋgamb ak mey, biynimb minim tiksi piyn kun biy riyt giniŋgambay gok sek, biynimb riyt gey niŋiy diniŋgambay gok sek Gor gek, miñmiñ giniŋgambay.

### **Jon Biynimb Miñmon Onep Ar Ak Kuyip Minim Yokak**

<sup>4</sup> Yand Jon. Nimbip biynimb Gor ker Esiya propens, miñmon sikoy keykey onep ar ak mindpim gok, minj tiksi piyn. Yip tep giniŋgamb ak, Gor bi nind mindek, miñiy mindip, kisen winiŋgamb ak; nimbip simb niŋiy, direp yimb ginimuŋ. Kawnan nuk tam pikiy onep ar ayip ak, siya kiyŋ kiñiŋ siŋak mindip ak kunep, nimbip simb niŋiy, direp yimb ginimuŋ. <sup>5</sup> Pen Jiysis Krays minim tep ak dand apiy, kiñiŋ gi kumiy tikjakiy, kisen biynimb maŋgiysek kond mindeniŋgamb ak; nuk kunep nimbip simb niŋiy, direp ginimuŋ.

Nuk chinup simb niŋiy kumak rek, kim amemb rek ayip. <sup>6</sup> Nuk kiyŋ yomb chin ak mindakniŋ, chin biynimb Gor nup simboŋgep gok mindiy, nup direp giyiŋ mindpun. Kun ak Jiysis Krays nup yimb ak, perper nep dand aranemb! Tep.

<sup>7</sup> Pen niŋim! Nuk semb sek wakniŋ, biynimb nup ñaŋgyak gok sek, biynimb miñmon okok maŋgiysek nup misej niŋniŋgambay. Nup niŋiy, yenen kun gipun aŋgiy, simb gek siy yomb yimb aŋgniŋgambay. Niŋind kun giniŋgamb! Tep.

<sup>8</sup> Gor Biyomb tap okok maŋgiysek ginimuŋ rek nep mindip ak aŋgip, “Tap okok maŋgiysek junj ak mey, yand mindpiyn aŋgip.” Bi aŋgip kun ak, nind mindek, miñiy mindip, pen kisen winiŋgamb.

### **Jon Kalambis Mindiy Jiysis Nup Niŋak**

<sup>9</sup> Yand namam nimbik Jon. Chin mey, biynimb Gor diy kond mindeniŋgamb gok mindpun. Pen biynimb yikop gok, chinup timey gey niŋiy, nup ma kirgiy, kilis yimb giy gon amjap. Yand Gor minim ak aŋgñiyiŋ, Jiysis nup gosimb niŋbiyn aŋgenik, yip kalambis ay, dam ñiŋg solwara timb kus gak, miñmon Patmos ayak.

<sup>10</sup> Kun okok minden, Biyomb chin ñin yomb nuk bap apek, Gor Kawnan ak yip bak ayakniŋ; kund yand okok ken minim yomb bap, biy kul rek aŋgiy aŋgak, <sup>11</sup> “Tap yerip gen niŋnimin gok, minj tikiy, biynimb Gor ker mindpay miñmon keykey onep ar ak kuyip, yokey amnimuŋ. Miñmon Yipiyses bap, Simena bap, Pegamam bap, Tayatayra bap, Sadiys bap, Piladelpiya bap, Leyodiysiya bap aŋgak.”

<sup>12</sup>Kun anggakniŋ, yand bi minim asap kun ak niŋiyn anggiy, andikiy niŋnik: lam gol diy giyak onep ar ak mindek. <sup>13</sup>Pen lam namb kun ak, Bi bap Niŋuk rek ak niŋnik. Nuk chech paryomb yimb bap yimiy, gol diy giyak ler pis yomb ak, kond namb siŋak pimbrikak. <sup>14</sup>Jun kas nuk ak, tund yimb giy, kanj siypsiyp kas tund rek akan, semb tund rek ak ayak. Windin nuk ak, mon maŋlaŋ rek mindek. <sup>15</sup>Tomb kind ak, tap kopa kilis 'bras' apay ak danŋiyey, yiniy kilind dip rek ak gak. Pen minim nuk ak, niŋ sinj yomb piŋiy, giw angip rek ak anggak. <sup>16</sup>Nin yipund kind nuk ak, gap onep ar ak di mindek. Pen ŋayip baynat kind pis pis gak ak, meng miŋgan biyoŋ arachakak. Jomluk nuk ak, pumbnamb yoŋ apiy, melik kind yimb anggiy gip rek ak gak.

<sup>17</sup>Yand nup niŋen nambiŋ gek, tomb angin nup siŋak apyap memben yimiy, biynimb pisnep kumbay par rek ak mindenik. Kun genik, nin yipund kind nuk ak yip diniŋiŋ anggak, "Ma piriknimin! Yand bi mind yimb mindiy, mind dand amiy, kisen mindnep mindeniŋgayn. <sup>18</sup>Yand mey bi permindep. Nind kumnik ak pen; niŋan! Miŋiy kim mindiy, perper nep mindeniŋgayn. Biynimb kumiy kinjeŋ tep ambay ak sek, kinjeŋ timey ambay ak sek kiywur ak, yand kond mindpiyn.

<sup>19</sup>"Kun ak miŋiy gisap rek niŋiy, kisen giniŋgamb rek niŋiy, maŋgiysek buk biyaŋ tiknimin. <sup>20</sup>Pen tap niŋsipan gok, minim kiŋiŋ nuk ak kun giy mindip: lam gol diy gayak onep ar niŋsipan gok, biynimb Gor ker mindpay miŋmon keykey onep ar ak. Pen gap onep ar ak, nin yipund kind yand ar ak niŋsipan gok, bi kuyip minim angŋemb gok niŋsipan anggak."

### Yipiyses Biynimb Kuyip Minim Anggak

**2** <sup>1</sup>"Pen bi Yipiyses biynimb Gor ker mindpay gok kuyip minim angŋemb ak nup, minim tikiy angnimin: Biyomb gap onep ar ak, nin yipund kind nuk ar ak di mindyiŋ, lam gol diy giyak namb okok tangip ak, minim angip gok tiksiyiyn. <sup>2</sup>Nuk angip: nimb mindrep giy, woŋg kilis giy gi dand amiy kosyam mindiy, pen yiruk ma niŋbim ak, niŋbiyn. Biynimb timey gipay gok kuyip niŋem, nimbip tep ma gip. Bi Jiysis minim dand amemb mindpun anggiy, yesek apay gok kuyip niŋrep giy, asikrep gipim. <sup>3</sup>Yip chingem nimbip miker ŋey, yiruk ma niŋiy chingiy nep mindpim ak, yip tep gip. <sup>4</sup>Pen minim bap mindip. Yip nind chingiy wasemb yimb ayiŋgipim miŋ ar ak, dam yokpim akay? <sup>5</sup>Yip Biyomb chin anggiy wasemb ayiŋgipim miŋ tep kun ak, yenen kirpun anggiy tip ak diy, mindrep giyiŋgipim rek mindenimimb. Mer ak, yand ap lam nimbip ak piliŋ diniŋgayn.

<sup>6</sup>"Pen ar bap girep gipim ak, yip tep gip. Biynimb Niŋkolas nup minim ak diy, miŋ timey ar ak gey yip tep ma gip rek, nimbip kunep gip.

<sup>7</sup>"Nimb biynimb gos sek mindenimimb gok, Gor Kawnan ak biynimb nup ker mindpay miŋmon keykey okok kuyip, minim angip

ak niḡnimimb. Biynimb miker apek, gos kuḡay ma niḡiy, yip chiḡiy nep mindey, ḡin kisen wiḡiḡamb ak kuyip anḡen, mon maḡiy bind permindep Gor woḡḡday nuk biyoḡ jakip ak diy, ḡiḡiḡiḡambay anḡak.’ ”

### Simena Biynimb Kuyip Minim Anḡak

<sup>8</sup>“Pen bi Simena biynimb Gor ker mindpay gok kuyip minim anḡḡemb ak nup, minim tikiy anḡnimin: Bi siḡok kumiḡ tikjakiy kim mindip ak; nind mindiy, mind dand apiy, mindnep mindeniḡamb ak; minim anḡip gok tiksipiḡ. <sup>9</sup>Nuk anḡip: Yand niḡbiḡn: Jiḡda gunap, chin Jiḡda yipund giy mindpun apay ak pen; Seytan biynimb nuk mindiy, nimbip minim diyiḡ mindpay. Miker nimbip yerip yerip mindip gok, yand kunep niḡbiḡn. Nimb biynimb simbgeprek mindpim ak pen; yand niḡen biynimb gin yimb mindpim.

<sup>10</sup>“Nimbip miker giniḡ gisap ak, gos yomb ma niḡnimimb. Niḡim! Maḡ mindip; Gor nup chiḡḡrep gipay akaḡ, apyap pikniḡambay anḡiy, Seytan gek; nimbip gunap di kalambis ayniḡambay. Pen yip ker mindpim ak niḡiy, nimbip ḡin onep wanjrem ak rek, gi timey giyiḡ mindeniḡambay. Pen nimbip yerip giniḡ gey akaḡ, pisnep pikayniḡ gey, gos yomb kun ak ma niḡnimimb. Yip chiḡiy nep mindem pikayniḡambay ak, nimbip ar band tep wiḡn giy diy, per mindeniḡambay ak, tomb ḡiniḡayn.

<sup>11</sup>“Nimb biynimb timund sek gok; Gor Kawnan biynimb nup ker mindpay okok kuyip, minim anḡip gok niḡrep ginimimb.

“Seytan nimbip nembnemb giniḡamb ak pen; biynimb yip chiḡiy nep mindeniḡambay gok, tip ak kumiḡ yiwur yomb dipay ak, ma diniḡambay.”

### Pegamam Biynimb Kuyip Minim Anḡak

<sup>12</sup>“Pen bi Pegamam biynimb Gor ker mindpay gok kuyip minim anḡḡemb ak nup, minim tikiy anḡnimin: bi ḡayip baynat nuk gol pis pis kind mindip ak, minim anḡip ak tiksipiḡn.

<sup>13</sup>“Nuk anḡip: Yand niḡbiḡn: nimb kosyam yimb mindpim. Biynimb miḡmon nimb mindpim namb ak, Seytan kond mindip. Pen nimb yip chiḡḡrep giy; minim yip ak direp yimb gipim. Miḡmon Seytan kond mindip kun ak, namam Antiypas minj woḡḡ yip giḡek, nup ḡanḡyak ak pen, yip ma kirpik. <sup>14</sup>Pen minim gunap mindip. Biynimb nimb gunap, Balam minim anḡḡiyiḡip rek anḡḡimbay. Bi Balam kun ak, Balak nup timund wiḡjikek mey, am anḡek, Yiḡrel biynimb gok yip kirgiy, tap ḡiḡemb tap yikop simboḡgiyak gok ḡimbyiḡḡ, biḡn siy bi siy giyiḡḡ, giyak.

<sup>15</sup>“Pen nimb gunap bi Niḡkolas minim ak diy, miḡ timey ar nup ak kisen giy, gem amimb. <sup>16</sup>Kun ak, chin yenen kun gipun anḡiy kirgiy, yip

chingrep ginimimb. Pen kun ma giningambim ak yand apiy, ñayip baynat menḡ mingan yand biyaḡ nimb arachakip ak diy, biynimb kun gipay gok yip penpen giningayn.

<sup>17</sup>“Nimb biynimb gos sek mindenimimb gok; Gor Kawnan biynimb nup ker mindpay miñmon keykey okok kuyip, minim aḡgip ak niñnimimb. Biynimb yip chingiy nep mindiy, mind dand amey, ñin kisen winiḡgamb gok; tap ñiḡemb semb biyoḡ nimb, biynimb yikop gok ma niḡbay ak, ñen ñiḡniḡgambay. Pen kuyip kamb tund gunap keykey ñiniḡgayn. Kamb ñiniḡgayn ar kun gok, yimb kisenimb ak keykey tik ñeniḡgayn, biynimb diniḡgambay gok nep niḡniḡgambay.”

### Tayatayra Biynimb Kuyip Minim Aḡgak

<sup>18</sup>“Pen bi Tayatayra biynimb Gor ker mindpay gok kuyip minim aḡḡiemb ak nup, minim tikiy aḡgnimin: minim biy Gor Ñinuk, bi siḡok windin mon maḡlaḡ rek gakniḡ, tomb kind nuk ak, kopa ‘bras’ apay ak daḡgiyey yin kilind dip rek, gakniḡ niḡbiyn ak; minim aḡgip ak tiksiyiyn. <sup>19</sup>Nuk aḡgip: nimb gipim miñ ar ak, yand niḡbiyn. Yip chingiy wasemb yimb ay, woḡḡ giñiyiḡ nep mindpim. Gipim kun ak, nind siskoy giyiḡgipim ak pen, miñiy tapin gipim. <sup>20</sup>Pen minim bap mindip. Biyn Jesebel minim yesek aḡgep ak, yand biyn Gor minim aḡgep aḡgek, nimb nup yenen kirgem, biynimb yip gok kuyip, minim yesek aḡḡakniḡ, tap keñmaḡgiy dam tap yikop simboḡḡ ñimbay gok ñimbyiḡḡ, biyn siy bi siy giyiḡḡ gipay. <sup>21</sup>Nuk gip miñ timey ar kun ak kirgiy, mindrep ginimuḡ akaḡ aḡgiy, niḡmind mer niḡiy kirpiyn. <sup>22</sup>Kun gip rek pen gen, miñak yomb giniḡgamb. Biynimb nup kindik gipay kun gok, yenen kun gipun aḡgiy ma kirgey, kuyip kunep gen miñak yomb giniḡgamb. <sup>23</sup>Biynimb nup pisnep kisen gipay gok kuyip pikayeniḡgayn mey, biynimb yand miñmon keykey mindpay rek, yip niḡrep giy aḡḡniḡgambay, ‘Nuk gos timund namb kuyip biyaḡ niḡrep yimb giy nep, biynimb gok bilokip aḡḡniḡgambay.’ Kun gipiyn rek, nimbip nokom nokom maḡgiysek gipim rek niḡiy, pen kun ak rek ñiniḡgayn.

<sup>24</sup>“Pen nimb Tayatayra biynimb gunap, biynimb aḡgambiyn gok, Seytan nup kilrimey simboḡḡinjun aḡgiy niḡbay rek niḡiy ma gipim ak mey; minim miker nimbip gunap ma mindip. <sup>25</sup>Pen yip chingipim miñ ak chichiy di mindem mindem, kisen yand ninim! <sup>26</sup>Biynimb yip chingiy nep mindiy, miker yomb apek ma kirginiḡgambay gok kuyip aḡḡen, yand yip biynimb miñmon keykey okok kuyip kond mindeniḡgambun. <sup>27</sup>Yenen, Bapiy minim bap yip aḡgiy aḡgak:

‘Yand aḡḡen, ayen kur bap diy, siḡgey tiyn gok pikjispuk giy, biynimb miñmon keykey gok kuyip kond mindeniḡgamb aḡgak.’

<sup>28</sup>“Pen biynimb mindrep giniḡgambay kun gok kuyip, gap poḡḡlin tep miñmon tirgum tikakniḡ, niḡbay rek ak ñiniḡgayn. <sup>29</sup>Nimb biynimb gos

sek mindenimimb gok, Gor Kawnan biynimb nup ker mindpay miñmon keykey okok kuyip, minim aŋgip kun gok niñnimimb.”

### Sadiys Biynimb Kuyip Minim Aŋgak

**3** <sup>1</sup>“Pen bi Sadiys biynimb Gor ker mindpay gok kuyip minim aŋgñemb ak nup, minim tikiy aŋgnimin: minim biy bi siŋok, Gor Kawnan tam pik onep ar ay, gap onep ar ak sek di mindip ak, aŋgip rek tiksipiyn. Miñ nimb yerer gipim ak niñbiyn. Biynimb gok niñey, yip ker mindpim rek ayip ak pen; yip ker ma mindpim rek ayip. Pisnep kumbim rek ayip ak pen, ñekñek band nimbik ak mindip rek, <sup>2</sup>wisin kil kinjipim ak kirgiy, tikjakiy Gor aŋgip miñ ar ak ginimimb. Miñ nimb gipim ar ak Gor niñek tep ma gip. <sup>3</sup>Kun ak minim tep aŋgñeyak niñiy dipik ak, yenen kirpun aŋgiy, tip ak diy, mindrep ginimimb. Biyomb ak kasek ma winiŋamb aŋgiy, wisin kil kin mindeniŋgambim ak; yand bi tap siy dep gok niñmindey ma opay rek ak apen, niñiy jiwдиниŋgambim.

<sup>4</sup>“Pen nimb Sadiys biynimb gunap niñrep gipim. Chech nimb gok gem gach ma gip. Nimb biynimb yand yimb gok mey, chech tund ay, yand yip taŋoniŋgambun. <sup>5</sup>Biynimb yip ker mindiy, miker diyinŋ, yip chingiy nep gey amniŋgamb gok, chech tund tep kun ak rek ayñiniŋgayn. Pen yimb kuyip permindep buk biyaŋ tikayen mindip ak, ma wiykyokniŋgayn; Bapiy sek, enjol nuk gok sek yip niñmindyakniŋ, yip ker mindpay aŋgiy, misen aŋgñiniŋgayn.

<sup>6</sup>“Nimb biynimb gos sek mindenimimb gok, Gor Kawnan biynimb nup ker mindpay miñmon keykey okok kuyip, minim aŋgip kun ak niñnimimb.”

### Piladelpiya Biynimb Kuyip Minim Aŋgak

<sup>7</sup>“Pen bi Piladelpiya biynimb Gor ker mindpay gok kuyip minim aŋgñemb ak nup, minim tikiy aŋgnimin: minim biy bi suŋrep; minim niñind yimb aŋgiy, kiyŋ Depiyt kiywur di mindyiniŋgip ak, di mindip anep aŋgek tiksipiyn.

Nuk aŋgip: yand kinjeŋ yiken, biynimb gunap giñiniŋgiy rek ma ayip; pen giñen, yikniŋgiy rek ma ayip. <sup>8</sup>Nimb gipim rek niñiy, nimbip kinjeŋ yikpiyn ak mey, biynimb gunap giñiniŋgiy rek ma ayip. Nimb biynimb kuŋay ma mindpim ak pen; minim yip ak ma kirgiy, yip chingiy nep mindpim. <sup>9</sup>Pen niñim: biynimb chin Jiwda yipund giy mindpun aŋgiy yesek apay gok, Seytan ker mindpay ak mey, kuyip aŋgen, tomb aŋgin nimbip siŋak koŋgim yimiy, jiy kuyaniŋgiy aŋgniŋgambay, ‘Nimbip nep mey, Kiyŋ yomb key yimb ak biynimb yand aŋgiy, wasemb ayip gok mindpim aŋgniŋgambay.’ <sup>10</sup>Nimbip timey gey, apiyn rek yip chingiy nep mindpim ak, biynimb mankumb biy kuyip maŋgiysek, miker ñiniŋgayn ñin ak, nimbip sek ma ñiniŋgayn.

<sup>11</sup>“Maŋ mindip niningayn. Yip chingiy mindpim rek, chingiy nep mindem mey, biynimb gunap gey ma apyap pikningambim; pisnep mindrep giningambim. <sup>12</sup>Biynimb an yip ker mindey kuyip timey gey, gos kun ak ma niŋiy, yip chingiy nep mindeningambay gok; kuyip gen, Gor aŋgniŋep korip sap yomb gok rek mindiy mey, yikop okok ma giranŋeningambay. Wak ar kuyip ak Bapiy nup yimb ak tikiy, dawin yomb nuk Jerusalem kisenimb ak tikiy; yimb yand kisenimb ak tikiy giningayn.

<sup>13</sup>“Nimb biynimb gos sek mindenimimb gok, Gor Kawnan biynimb nup ker mindpay miñmon keykey okok kuyip, minim aŋgip kun gok niŋnimimb.”

### Leyodiysiya Biynimb Kuyip Minim Aŋgak

<sup>14</sup>“Pen bi Leyodiysiya biynimb Gor ker mindpay gok kuyip minim aŋgñemb ak nup, minim tikiy aŋgnimin: Minim biy, Biyomb tap okok maŋgiysek gay, Nop aŋgip rek giy, minim niŋind yimb nep aŋgip ak, aŋgek tiksiŋiyn.

<sup>15</sup>“Nuk aŋgip: miñ nimb gipim ak yand niŋbiyn. Yip pisnep ma chingipim: pisnep ma kirgipim. Yip gosimb ar ar nep niŋiy, mindrep gispun aŋgiy niŋbim ak, nimbip yepiynim rek ayip. <sup>16</sup>Yip pisnep ma chingipim; pisnep ma kirpim rek niŋiy, nimbip wokyokning gispiyn. <sup>17</sup>Nimb apim, “Chin mindrep gipun. Tap chin kuŋay mindip; tap bap ma tikdip apim ak pen;” minim ma niŋbim ak: nimb biynimb windin koy giy, daynep mindiy, simbgeprek mindpim. <sup>18</sup>Kun ak mey, niŋrep ma gipim rek, minim yand apiyn ar ak diy, windin malasim yip ak tawiy aynimimb. Nambiŋ gakniŋ mindpim rek, chech tund tep yip ak tawiy aynimimb. Pen gol daŋgiyen yiniy, day day sek ma mindip ak tawiy mey, mindrep giningambim. <sup>19</sup>Biynimb wasemb aypiyn gok timey gey, kuyip ma kirpiyn; mindrep giyaŋ aŋgiy, miker ñiyiŋ timund winjikpiyn. Kun ak yenen kun gipun aŋgiy kirgiy, mindrep ginimimb. <sup>20</sup>Niŋim! Yand ap mis akyaŋ mindyiŋ, yip an rek aŋgdinimuŋ aŋgiy, kinjeŋ pikgiygiw giyiŋ kond mindpiyn. Biynimb minim yip ak niŋiy, aŋgey korip miŋgan amniŋgayn gok: yand kiy yip tap ñimbiy; kiy pen yand yip tap ñimbiy, jimñiy mindoningambun.

<sup>21</sup>“Seytan yip miker yomb ñak ñin ak, Bapiy nup minim ak ma kirginik; aŋgak rek nep gi dand amen mey, Bapiy yip aŋg dam siya kiyŋ nuk mindip ar ak ayak. Kun ak rek, biynimb Seytan kuyip miker ñek, yip chingiy nep mindeningambay gok, kuyip aŋg dam siya kiyŋ yand ar ak ayniŋgayn.

<sup>22</sup>“Nimb biynimb an gos sek mindenimimb gok; Gor Kawnan biynimb nup ker mindpay miñmon keykey okok kuyip, minim aŋgip kun ak niŋnimimb aŋgak.”

**4** <sup>1</sup>Pen minim tikpiyn kun ak day niŋdiy, tip ak niŋnik: Gor miñmon biyoŋ kinjeŋ yikiy mindek. Nind biykul rek angek niŋnik ak, tip ak aŋgiy yip angak, “Ar biy apey, tap kisen giningamb gok nip yomiyn angak.” <sup>2</sup>Kun aŋgakniŋ, Gor Kawnan ak ap yip bak ayakniŋ niŋnik: semb biyoŋ Biyomb bap siya ar siŋak bisinŋ mindek. <sup>3</sup>Mumbwak jomluk nuk ak mokyaŋ ñiluk yimb ak giy, kum gondmay bi rek ak mindakniŋ, tiybeñ ak nup gaw giy, guŋgiñ paŋgiñ giy, yirik yapyinŋ mindek. <sup>4</sup>Siya nuk ak namb biyaŋ mindakniŋ, biyomb bisinŋipay siya onep ñin jiwiy andikiy nokom bap ay kus giyak. Biyomb minim tungasikep gok chech tund yimiy, gol diy giyak ar band gok keykey ay, bisinŋ mindeyak. <sup>5</sup>Biyomb yimb ak bisgak siŋak, añiñak diyinŋ, timuk yomb aŋgnep mindakniŋ, giw angek parsek amnak. Kiñiŋ kun siŋak sup melik onep ar ak melik gi mindek. Sup melik kun gok mey, Gor Kawnan nuk ak rek. <sup>6</sup>Biyomb kiyaŋ siya nuk mindek kiñiŋ siŋak, kamb kilmenjik ak galas rek, kind yimb aŋgiy mindek. Siya bak nuk ak, bi kiyaŋ man ar biy nimb kamb tap yikop gok diy, kayn ayndik tap gok gayey mindip rek ma mindek; tap kim mindep omiñal omiñal jak mind kus giyak. Tap kun gok windin kund okok mindiy, wiŋ okok mindiy gak. <sup>7</sup>Tap kim mindep kun gok, bap kaw ñiluk rek ayak, bap layon rek ayak, bap biyimb jomluk rek ayak, bap yakir duk pil parsek aytapay rek ayak. <sup>8</sup>Pen tap kun gok maŋgiysek pilkind onep kaŋgol ak ayak. Windin kuŋaynep: ar okok diy, wiŋ okok diy maŋgiysek yiwgak. Pen pumbnamb kisyimken, kamep aŋgnep mindiyinŋ apay:

“Nuk bi suŋ-tep!

Nuk bi suŋ-tep!

Nuk bi suŋ-tep!

Gor Biyomb yimb!

Tap magep bap ma mindip; yerip yerip giniŋ giningamb!

Nind yimb yimb mindiy, mind dand apiy, miñiy mind nep mindip!

Kisen tip ak winiŋgamb apay.” <sup>9</sup>Pen tap kim mindep keykey

omiñal omiñal kun gok, Biyomb ak nup tep aŋgyinŋ yimb dand aranyakniŋ, <sup>10</sup>biyomb minim tungasikep ñin jiwiy andikiy nokom bap aŋgambiyn gok; ar band kiyk gok tungjiw nuk mindip siŋak yokiy, koŋgim yimiy, Biyomb yimb ak perper mindeniŋgamb aŋgyinŋ, yimb dand aranyinŋ apay:

<sup>11</sup> “Gor Bapiy yomb chin!

Nand tap okok maŋgiysek gaynak.

Nand Biyomb, tap ma ginimin rek bap ma mindip.

Yimb nip dand aranemb.

Nand mindey mey; biyimb mindiy, tap yerip yerip okok mindiy gip apay.”

### Jon Buk Miñ Komyak Bap Niŋak

**5** <sup>1</sup>Pen niŋnik: Biyomb kiyaŋ ak buk minj paryomb day day komyak bap, ñin yipund kind ak di mindek. Buk minj komyak kun ak,



yimb gok mis ar okok ken tikiy, miŋan akyan ken tikiy giyak. Pen day day komiy, miñ keykey onep ar ak tiwningrep yimb giyak. <sup>2</sup>Giyak kun ak niñnikniñ: Gor enjol nuk yomb yimb bap angek apiy, suk yomb angyi angak, “Biynimb an rek miñ ayak biy wisikiy, buk kun biy mikal giniŋgamb?” <sup>3</sup>Kun angak ak pen, biynimb semb biyoŋ akaŋ, mankumb biy akaŋ, molik nukyan gunap akaŋ, buk minj kun ak mikal giniŋningiy rek bap ma mindeyak. <sup>4</sup>Kun gek niñen, simb gek siy angnik. <sup>5</sup>Pen bi minim tuŋsikep mindeyak gok bap yip angak, “Siy ma angnimin. Bi kayn Layon kilis rek bap mindip. Nuk Jiwda nimb: kiyŋ Depiyt tikek tik dand amiy, nup tikiyak. Nuk Biyomb mindip rek, buk kun ak miñ wisikiy, mikal giniŋgamb angak.”

### Jon Siypsiyp Ñiluk Ak Nup Niŋak

<sup>6</sup>Kun angakniñ niñnik: Siypsiyp Ñiluk ñangayey kumiy tikjakak rek bap, mindek siya kiyŋ namb siŋak. Siypsiyp Ñiluk kun ak kom onep ar ak, windin onep ar ak ayak. Windin onep ar ayak minim junj ak, Gor Kawnan nuk yokek, miñmon okok maŋgiysek kind kind amimb. <sup>7</sup>Pen Siypsiyp Ñiluk ak Bi kiyŋ yomb bisgak kiñiñ siŋak amiy, buk minj komiy ñin yipund kind okok ken di mindek ak dak. <sup>8</sup>Dakniñ, tap pilkind onep kaŋgol ayak gok sek, biyomb minim tuŋsikep gok sek ap, mindek siŋak kaŋgim yimyak. Biyomb minim tuŋsikep kun gok kiyk, tap giyta rek gok keykey diy, diys gol diy giyak gok keykey di mindeyak. Diys di mindeyak miŋan kun gok, tap daŋgiyey yin sikum giy kuyrep wip ak, arachakiy mindek. Tap Gor nup daŋgiyey yin kuyrep wip kun ak; biynimb gok Gor nup angniney, nup tep gip rek ak. <sup>9</sup>Pen kiyk kamep kisenimb bap angyi angyak, “Nand kumiy tikjakiy, biynimb miñmon keykey mindpay rek, kiñiñ keykey mindpay rek, minim yimb keykey apay rek, wak keykey ayak rek gunap Gor ker dinak ak mey, nak nep buk komiy tiwningrep gak kun ak, wisikiy mikal giy niñnimin rek mindip. <sup>10</sup>Pen kuyip direp gipan kun ak, kiyk Gor chin ak nup woŋg giñi mindiy, kisen nand yip, biynimb mankumb biy kuyip maŋgiysek, kond mindeniŋgambim angyak.”

### Siypsiyp Ñiluk Ak Nup Yimb Dand Aranyak

<sup>11</sup>Pen tip ak niñiy niñnik: enjol ñin jiwiy ñin jiwiy, tawsin miyliyon kuŋay yimb nep, ap Gor siya kiyŋ nup ak sek, tap kim mindep pilkind onep kaŋgol ayak gok sek, bi minim tuŋsikep gok sek kuyip piñiy kus giy, <sup>12</sup>meŋg miŋan dand araniy kamep angyiŋ angyak:

“Siypsiyp Ñiluk Gor nup simbongniŋg kumak ak, nuk bi tep yimb.  
Nuk mey; biyomb yimb,  
mindrep yimb gip,  
gos tipaŋgiy niñimb,

yerer gining giningamb.  
 Nup bi yimb sek angyi,  
 yimb dand araniy,  
 bi tep yimb angninyi angyak.”

<sup>13</sup>Pen niñnik: tap Gor gayak, semb biyon, man biy, lum namb nukyan, ñing solwara namb okok mañgiysek kamep angyi angyak, “Biyomb siya kiyn bisgip ak sek, Siypsiyp Niluk ak sek gos tipangiy niñbiyr rek, yimb kuyip apiyminay ak perper dand aranemb angyak.”

<sup>14</sup>Kun angeyak, tap pilkind onep kañgol ayak gok angyak, “Niñind apay!” Kun angeyak, bi minim tungasikep gok koñgim yimiy, kuyip apiyminay yimb dand araniyak.

### Siypsiyp Niluk Ak Miñ Onep Ar Ak Wisikak

**6** <sup>1</sup>Pen niñmindnikniñ, Siypsiyp Niluk ak, Nop buk komiy miñ tiwning wosgek di mindek ak, miñ day biy ak wisikakniñ, tap pilkind onep kañgol ayak gok, bap minim yomb timuk angyi rek angyi angak, “Owan!”

<sup>2</sup>Angek niñnik: kanj hos tund bap arachakak. Bi hos ar kun ak bising mindek ak, Gor gek wiyn ginimuñ rek nep ayek mey, nup arband wiyn giy dipay ak ayñek, chim ak dand miñmon okok amiy, biynimb gok yip penpen giy, ñangjiw yokning amnak.

<sup>3</sup>Pen Siypsiyp Niluk ak, miñ namb ak wisikakniñ, tap pilkind onep kañgol ayak bap pen angak, “Owan!” <sup>4</sup>Angek niñnik: kanj hos likañ bap arachakak. Gor bi hos ar biyon bising mindek ak nup baynat yomb bap ñek, nuk am gek, biynimb miñmon okok mañgiysek kapkap mindeyak ak kirgiy, penpen ñangying gey amnak.

<sup>5</sup>Pen Siypsiyp Niluk ak, miñ namb kaney ak wisikakniñ, tap pilkind onep kañgol ayak bap pen angak, “Owan!” Angek niñnik: hos mosimb bap arachakak. Bi kanj hos ar kun ak bising mindek ak, tap keñmangiy sikel aypay bap di mindek. <sup>6</sup>Minim bap, tap pilkind onep kañgol ayak gok mindeyak namb siñak nimb angyi angak, “Yiwan yomb winingamb rek, maniy kind nokom dand amiy, tap kuñay tawyingipay rek ma tawningambay. Wiyt mañgiy tawning, kaw nokom bap nep tawningiy; pen baliy mañgiy tawning, kunep kaw omiñal nokom nep tawningiy. Pen oliyp wel ak sek, ñing wayn ak sek per tawpay rek, tawningiy angak.”

<sup>7</sup>Pen Siypsiyp Niluk ak, miñ tiñgawip ak wisikakniñ, tap pilkind onep kañgol ayak kisen ak angak, “Owan!” <sup>8</sup>Angek niñnik: kanj hos pik bap arachakak. Bi hos ar kun ak bising mindek ak, yimb nuk “Kumemb”; pen binuk yip apek ak, yimb nuk “Chip-kawnan-korip.” Gor gek mey, bi omiñal kun ak ar keykey ger, biynimb miñmon okok kuñaynep kumningiy rek ayak. Gunap penpen ñangiy kumningambay, gunap yiwan yomb apek kumningambay, gunap miñak tap okok gek kumningambay, gunap kayn ayndik tap sakiy okok siw ayey kumningambay. Kun giy

kum dand apiy mey, biynimb mankumb biy mindpay kuḡaynep rek kumningambay, pen kuḡaynep yimb mindeningambay.

<sup>9</sup>Siypsiyp Niluk ak, miñ mamind ak wisikakniḡ niḡnik: Gor nup simbonḡep bind beḡ ak, biynimb Gor minim tep nup niḡiy deyak, kuyip ḡaḡgayak kawnan gok mindeyak. <sup>10</sup>Kiyk suk yomb aḡgiy aḡgyak, “Gor. Nand Biyomb kilis yimb. Bi suḡ-tep, niḡind yimb ar ak nep gipan! Pen ḡin yerip yerip mindiy, biynimb lum ar biyaḡ, chinup ḡaḡgayak gok kuyip, kor giy, yiwur ḡiningamban?” <sup>11</sup>Kun aḡgyakniḡ, enjol gok kuyip chech tund par keykey ḡiying aḡgyak, “Maḡ mindip; kond mindenimimb. Namam nanay Gor nup direp gipim rek gipay gok, gunap sek pikayey mey, Gor ḡin paḡgayak namba ak amek, aspim rek giningamb aḡgyak.”

<sup>12</sup>Pen Siypsiyp Niluk ak, miñ kaḡgol ak wisikakniḡ niḡnik: monmon yomb sikerek ak dakniḡ, pumb ak, wand anḡil mon yiniy gach gip rek ak gek, takin ak pisnep likaḡ yimb gak. <sup>13</sup>Gap gok, pinim kilis ak diy, kiyaw maḡgiy pik ma gip gok, pirmar giyowip rek ak yowyak. <sup>14</sup>Pen semb biyoḡ mat ak paḡ aypay rek ak gak. Miñmon yirik gok sek, miñmon ḡiḡ timb kus gak gok sek mindiyḡipay tip ak kirgiy; liḡ keykey amniyak. <sup>15</sup>Kun gakniḡ, kiḡḡ miñmon keykey gok, biyomb yikop gok, amiy bi kond mindeyak gok, biynimb gin yimb gok, biynimb yimb ma mindek gok, kalambis mindeyak gok, biynimb kalambis ma mindeyak gok maḡgiysek, pirik am kamb miḡan man miḡan okok weygiyak. <sup>16-17</sup>Weygiy aḡgyak, “Biyomb siya ar biḡiḡ mindip ak sek, Siypsiyp Niluk ak sek chinup yiwur yomb ḡiningayr ḡin kisen per apun ak wip ak mey, mindenjun rek ma ayip. Kamb puḡgiwiw akaḡ, miñmon yirik yomb guniy paḡ apiy, chinup pisnep yiwginimuj ak, tep yimb aḡgyak.”

### Yisrel Biynimb Kuḡaynep Gor Kil Nup Ak Diyak

**7** <sup>1</sup>Pen tip ak niḡnik: enjol oneḡ tiḡawip ak; pinim diy, mankumb, ḡiḡ solwara, mon, tap okok timey ma ginimuj aḡgiy; day keykey tim giyak. <sup>2-3</sup>Enjol bap pen pumb lim gip okok nimb, Gor tap kil tikayep nuk ak dand apiy, biynimb nuk gok kuyip kil tikayniḡ, enjol pinim gey wiḡiḡ gek gok kuyip aḡgak, “Aland gim! Biynimb Gor nup direp gipay gok maḡgiysek, kil nup ak awinbeḡ kuyip biyoḡ tikayonjun; kisen pinim ak yepyem, ap ḡiḡ solwara, mankumb, mon tap gok gi timey ginimuj aḡgak.”

<sup>4</sup>Pen minim bap aḡgyak: biynimb Gor kil nuk awinbeḡ biyoḡ tikayningambay kun gok, Yisrel biynimb kiḡiḡ keykey gok jimḡiy, wan handret powtiy pow tawsin rek.

<sup>5</sup> Biynimb kun gok, Jiwda kiḡiḡ ak nimb 12,000;

Riwbiyn kiḡiḡ ak nimb 12,000;

Gat kiḡiḡ ak nimb 12,000;

<sup>6</sup> Esa kiḡiḡ ak nimb 12,000;

Naptalay kiñiñ ak nimb 12,000;  
 Manase kiñiñ ak nimb 12,000;  
<sup>7</sup> Simiyon kiñiñ ak nimb 12,000;  
 Liypay kiñiñ ak nimb 12,000;  
 Ayseka kiñiñ ak nimb 12,000;  
<sup>8</sup> Sebyiwan kiñiñ ak nimb 12,000;  
 Josep kiñiñ ak nimb 12,000;  
 Benjamen kiñiñ ak nimb 12,000 ak mey, jimñiy wan handret powtiy  
 pow tawsin rek.

<sup>9</sup> Pen tip ak niñiy niñnik: Biyomb siya kiyñ yomb bisgak ak sek, Siypsiyp Ñiluk ak sek mindrikiñiñ, biynimb kuñaynep ap windin yirik ar kuyip siñak mindeyak. Biynimb kun gok, miñmon keykey ayak rek, kiñiñ keykey ayak rek, wak keykey ayak rek, minim yimb keykey apay rek, okok nimb okok nimb apiy mindeyak. Biynimb ñin pangep rek ma mindek kun gok, mañgiysek chech tund nep ay, alband kas di mindyiqñ,  
<sup>10</sup> Gor nup yimb ak dand aranyiqñ, suk yomb añgiy añgyak, “Biyomb siya kiyñ bisgip ak sek, Siypsiyp Ñiluk ak sek chinup tawasikrik rek mey, kim amniñgambun añgyak.”

<sup>11</sup> Enjol gok mañgiysek ap, bi siya kiyñ yomb bisiqñ mindek ak sek, bi minim tungasikep gok sek, tap kim mindep onep tinqawip gok sek kuyip piñiy kus kus giy, apyap koñgim yimiy, jiy kuyangiy, Gor nup yimb ak dand aranyiqñ, <sup>12</sup> añgyak:

“Niñind yimb aspun!

Gor Biyomb chin ak, yimb nup ak perper nep dand aranjun.

Nuk Biyomb yimb;

Bi gos tipangiy niñimb.

Nup tep añgiy,

yimb dand aranyiqñ,

chinup kond mindonimuñ añgey mey,

biynimb gok kuyip perper nep kond mindonimuñ.

Nimbip niñind yimb aspun añgyak.”

### Tip Ak Yiwur Ma Diniñgambay

<sup>13</sup> Pen biyomb kun gok bap, yip añgniñiy añgak, “Biynimb chech tund teprep aypay kun gok nand niñban? Pen kiyk akay nimb opay?”

<sup>14</sup> Añgek añgnik, “Biyomb. Yand ma niñbiyn; yip añgñan añgrik.” Kun añgen, yip añgak, “Biynimb guniy kuyip miker ñey, kosyam yimb mindiy opay. Pen kiyk Siypsiyp Ñiluk likañ ak diy, chech kiyk gok wasyim gey, tund gip. <sup>15</sup> Kun ak mey, kiyk Gor siya kiyñ kiñiñ namb siñak mindyiqñ, pumbnamb kisyimken korip nup añgniñep miñgan ak wong giñiyiqñ, yimb nup dand aranyiqñ gipay. Bi siya kiyñ bisgip kun ak, kuyip kond mind tep yimb giniñgamb. <sup>16</sup> Kuyip yiwur ma giniñgamb, ñiqñ nen

ma giningamb, pumb sinjrimey niņiy yiwur ma giningamb. <sup>17</sup>Yenen: Siypsiyp Ñiluk siya kiņy kiņiņ yimb siņak mindip ak, kuyip kond mindrep giningamb. Kuyip poņind ñiņg kilam jiwningamb okok amek, ñiņg permindep ak ñiņningambay. Pen Gor siy ñiņg kuyip ak maņgiysek, wiykyokniņgamb aņgak.”

### Siypsiyp Ñiluk Ak Miñ Ar Ak Wisikak

**8** <sup>1</sup>Pen Siypsiyp Ñiluk ak, miñ nokom mindek ak wisikakniņ, semb biyoņ kilpul ma giy, yep won bap yikop mindek. <sup>2</sup>Pen niņnik: enjol onep ar ak, Gor windin yirik ar siņak jak mindeyak. Enjol kun gok kuyip biykul keykey ñek, di mindeyak.

<sup>3-4</sup>Enjol bap pen tiyn tep gol diy giyak won bap diy, Gor nup tap pik simboņgipay bind ar gol siņak jakiy mindek. Nup tap daņgiyey yin kuyrep wip ak kuņaynep ñeyak, di Gor bind nup gol diy giyak ar ak daņgiyek, sikum ak yin aranyiņg, Gor biynimb nup aņgniņyak minim ak sek yingonņ giy, aran amnak. <sup>5</sup>Pen gol diy giyak tiyn won kun ak diy, mon binj Gor nup simboņgep bind ar biyoņ yinek gok, di tiyn miņgan biyaņ ayek arachakek, di mankumb ar biyaņ yokek; monmon apiy, aņiņak diyiņg, timuk aņgyiņg, aņgek parsek amnak.

### Biykul Gok Puņgning Geyak

<sup>6</sup>Won kun ak, enjol onep ar biykul di mindeyak gok, dand araniy puņgning geyak.

<sup>7</sup>Enjol nind ak, biykul nuk ak puņgek, mon maņlaņ ak sek, dikiy niņgomb maņgiy ak sek likaņ kom kom giy, man ar biy soņgyowak. Pen soņgak kun ak; mankumb biy day omiņal nokom rek aņgiy, day omiņal rek mindek, day nokom bap, mon, tap kas kim kim jak mindek gok, maņgiysek yin simbok amnak.

<sup>8-9</sup>Pen enjol namb ak, biykul nuk ak puņgek; miñmon yirik yomb sikerek mon rek yinek bap, ñiņg solwara namb siņak diyokey, siyip kun okok mindeyak gok pikpaņg pikek amek, ñiņg solwara ak likaņ tawek amek, piys tap mindeyak gok maņgiysek kumyak.

<sup>10</sup>Pen enjol namb kaneņ ak, biykul nuk ak puņgek, gap poņglin yomb mon yinimb rek yinek bap, semb biyoņ nimb puņgjiw ñiņg yomb apyowip gok sek, ñiņg kilam jiwip gok sek kuņaynep gi timey gak. <sup>11</sup>Gap kun ak yimb nuk, “Malasin silik” aņgyak. Biynimb kuņay yimb nep, ñiņg gi timey gak kun gok ñimbiy kumyak.

<sup>12</sup>Pen enjol tiņgawip ak, biykul nuk ak puņgek, pumb, takin, gap gok sikum rek pikyiwgiy, melik tep per gip rek ma gak. Pumb ak timey giy, takin gap gok timey giy, melik giyiņgip rek ma gak.

<sup>13</sup>Pen yand kun giy niņmindyiņg niņnik: yakir duk ak semb namb siņbiyoņ wiņind taņgyiņg, minim yomb rek aņgiy aņgak, “Ak-ey! Ak-ey!

Timey yimb gining gisap. Enjol omiŋal nokom, biykul kiyk puŋgning gispay ak puŋgyakniŋ, biynimb mankumb ar biy mindpay gok kuyip, timey yimb giningamb aŋgak.”

### Enjol Mamind Ak Biykul Nuk Puŋgak

**9** <sup>1</sup>Enjol mamind ak, biykul nuk ak puŋgakniŋ, gap semb biyoŋ nimb puŋgjiw mankumb biy owak bap nup niŋnik. Pen nup kiy kaw miŋgan kiruŋ ma tikak ak űeyak, <sup>2</sup>kawrumb kinjeŋ ak yikek, sikum yomb sikerek ak araniy, pumb ak sek, takin ak sek gek yiw giy, kisyim owak. <sup>3</sup>Kun gek, joŋ golbind gok, sikum namb kun okok nimb gi dam man ar biyaŋ ay, tap kanj meŋg yomb gok gipay rek gining geyak. <sup>4</sup>Gor golbind kun gok kuyip aŋgak, “Minj kas mon kas tap yerip yerip man ar biyaŋ jaknimuŋ gok, gi timey ma ginimimb; biynimb kil yand ak awinbeŋ kuyip biyoŋ ma mindip gok nep, gi timey ginimimb aŋgak.” <sup>5</sup>Aŋgak kun ak, pisnep pikayem kumniŋgiy aŋgiy ma aŋgak, yikop takin onep mamind ak yiwur űinimimb aŋgiy aŋgak. Kuyip yiwur űiningambay kun ak, tap kanj meŋg yomb gok siwey yiwur gip rek giningamb. <sup>6</sup>űin namb kun ak, biynimb kun gok kumbinup aŋgiy niŋningambay ak pen; kumemb kinjeŋram bap ma mindeniŋgamb.

<sup>7</sup>Joŋ golbind kun gok, biynimb kanj hos dand penpen űaŋgning, tap kilis aypay rek gok, ay mindeyak. Jun kiyk biyoŋ ar band gol diy giyak gok ayak. Jomluk kiyk gok, biynimb rek ayak. <sup>8</sup>Jun kas kiyk gok, biyn jun kas rek ayak. Pen meŋg kiyk gok, kayn ayndik layon apay ak meŋg rek ayak. <sup>9</sup>Pambil okok, ayen siyor rek ak ayak. Pen kuŋaynep pil pikeyak, kanj hos gok, korip gumiy sek gok kuŋaynep lipiŋg dand penpen űaŋgning amey, giygiw aŋgip rek gok aŋgak. <sup>10</sup>Sumb day biym, maploŋgim biynimb siwamb yiwur gip rek ak gak. Gor kuyip aŋgek, takin onep mamind ak, biynimb gok kuyip yiwur űiyiŋg mindeniŋgambay. <sup>11</sup>Tap kun gok kiyŋ kiyk mey, enjol siŋok kaw miŋgan kiruŋ ma tikak ak nimb; Hiybriw minim aŋgiy, yimb nuk Abadon apay; pen Griyk minim aŋgiy, Apoliyon apay. Minim junj kun ak mey, “Biyimb gi timey yimb gip.”

<sup>12</sup>Kun ak miker yomb nind ak wip; pen omiŋal mindip.

### Enjol Kaŋgol Ak Biykul Nuk Puŋgak

<sup>13</sup>Pen enjol kaŋgol ak, biykul nuk puŋgakniŋ niŋnik: minim bap bind ar gol diy giyak bak siŋak nimb, <sup>14</sup>enjol biykul di mindek ak nup aŋgak, “Enjol timey omiŋal omiŋal tiwning ayey, űiŋg yomb Yiwpreytiys gol siŋak mindpay gok, wisik yoknimin aŋgak.” <sup>15</sup>Yenen: Gor enjol kun gok kuyip nind aŋgayek, simiy kun ak nep, űin kun ak nep, won kun ak nep kond mindyiŋgipay ak mey, űin kun ak apek, biynimb mankumb biy kuŋaynep űaŋgningiy aŋgiy, wisik yokak. <sup>16</sup>Pen yip aŋgyak, “Amiybi

kunay yimb nep, tiw handret miyliyong rek tikjakiy, penpen nangning gispay angyak.”

<sup>17-18</sup> Pen niņnik: kanj hos kiyk gok sek, bi hos ar bisgiyak gok sek ayin tingliys ayak gok, gunap mon maņlaņ likaņ rek gak, gunap miymor muk rek gak, gunap kamb walin “salpa” apay ak rek gak. Kanj hos jun gok, kayn layon jun rek ayak. Meņg miņgan kiyk biyong sikum sek, mon maņlaņ sek, tap salpa yuk timey ak sek apiy gek, biynimb kunaynep kumyak. <sup>19</sup>Kanj hos kun gok kilis kiyk ak mindek, jun day bineņ sek, yiniņg day biym sek. Yiniņg kiyk gok, siyņ jun rek ayak ak mey, biynimb gok kuyip gi timey giyak. <sup>20</sup>Pen biynimb kunaynep yimb kumey, biynimb mindeyak gok gak kun ak niņiy; yenen tap siy tap timey gipun angyi niņiy ma kirgiyak. Pen tap yikop minim ma angyi, gos ak niņiy, kinjeņ ma taņgiy; kamb, mon, gol, siylpa, biras diy gayak gok angnisipun angyi; kichekiy tap gok kuyip nep angnimindeyak. <sup>21</sup>Pen chip nangiy, koyimb pikiy, kunj giy, tap siy diy, biyn siy bi siy gey amnakniņ; yenen kun gipun angyi ma kirgiyak.

### Enjol Ak Jon Nup Buk Nēk Nijak

**10** <sup>1</sup>Pen tip ak niņnik; enjol kalrimey yimb bap semb biyong nimb mis apek. Enjol kun ak nup, semb kom kom gakniņ, tiybeņ ak jun nup ak paņg gaw giy, jomluk nuk ak, pumb rek yiniy, tomb kind nuk ak, mon yiniy maņlaņ gip rek ak gak. Nuk semb biyong nimb apiy, <sup>2</sup>tomb yipund kind ak niņg solwara ar ak tawiy, aņind kind ak lum ar ak tawiy, buk sikoy band bap mikal giy dimdiyiņg, <sup>3</sup>kayn layon minim rek ak aņgek, timuk onep ar ak minim gunap pen angyak. <sup>4</sup>Minim angyak kun ak tikayin aņgen, minim bap semb biyong nimb aņgak, “Minim kun ak sek ma tiknimin aņgak.”

<sup>5</sup>Pen enjol tomb piskind ak niņg solwara ar taw mindek, piskind ak lum ar taw mindek niņnik ak, niņ yipund kind ak dand araniy Gor miņmon biyong yomiy aņgak, <sup>6</sup>“Yesek ma apiyn. Biyomb perper mindeniņgamb ak; mankumb, solwara, semb biyong maņgiysek gayak rek, yimb nup diy niņind yimb aspiyn. Miņiy tapin mindiy mer; <sup>7</sup>won biy nep enjol ar ak, biykul nuk puņgakniņ, Gor giniņgayn aņgak rek giniņgamb. Biynimb gok minim kun ak ma niņyiņgipay ak pen; nuk bi minim nup aņgep gok kuyip gos nēk, aņgeyak niņnuk rek, miņiy maņ asaw: pisnep misēg giniņgamb aņgak.”

<sup>8</sup>Pen minim bap semb biyong nimb yip tip ak angyi aņgak, “Enjol tomb piskind ak solwara ar taw mindip, piskind ak man ar taw mindip anup am aņgey, buk sikoy mikal giy di mindip ak, nip niņimuy aņgak.”

<sup>9</sup>Kun aņgek, enjol mindek ak amiy, yip buk sikoy kayaņ ak niņ aņgen, yip niyiņg aņgak, “Diy niņan. Nimbey, meņg miņgan nip ak bum niņg yindik gip rek giniņgamb ak pen, koņgiy namb biyaņ amiy, timey

giniᅅgamb angak.” <sup>10</sup> Angek, buk minim kun ak diy n̄imben, bum n̄iᅅg yindik rek gak ak pen; n̄imb namb biyaᅅ ayen, timey gak.

<sup>11</sup> Pen yip aᅅgyak, “Biynimb miᅅmon keykey, wak keykey, minim yimb keykey kiyaᅅ kiyaᅅ gok sek, kisen kuyip yerer giniᅅgamb ak, minim gunap sek aᅅgningamban aᅅgyak.”

### Bi Gor Minim Aᅅᅅnemb Omiᅅal Ak

**11** <sup>1</sup> Pen yip kur par tap aynaᅅbay bap n̄iyaᅅg aᅅgyak, “Am Gor aᅅgnaᅅep korip ak aynaᅅiy, Gor nup tap simbonᅅipay bind ar ak aynaᅅiy ginimin. Biynimb Gor aᅅgnaᅅep korip miᅅgan apiy nup aᅅgnaᅅipay gok kunep, n̄in paᅅg niᅅnemin. <sup>2</sup> Pen biynimb Jiᅅda mer gok, per ap wariy mis akyayaᅅ mindpay rek, tip kun ak sek ma aynaᅅnemin. Yenen: kiyaᅅ nep dawin yomb suᅅ-tep Jerusalem timey giyaᅅg mindey mindey, n̄in wan tawsin tiw handret sikistiy amniᅅgamb. <sup>3</sup> Yand pen, bi minim yip aᅅᅅnemb omiᅅal aᅅgyoken, yikop bek band rek gok yimaᅅg, minim yip aᅅᅅni taᅅger, n̄in wan tawsin tiw handret sikistiy kun ak amniᅅgamb aᅅgak.”

<sup>4</sup> Bi minim nup aᅅᅅnemb omiᅅal kun ak, mon oliyp bind omiᅅal rek ak pen, lam omiᅅal rek. Kiymiᅅayaᅅ Biyomb mankumb biy kond mindip ak nup woᅅg giᅅniᅅgambiy. <sup>5</sup> Pen biynimb gunap kuyipmiᅅayaᅅ timey giniᅅg gey, mon maᅅlaᅅ meᅅg miᅅgan kiyaᅅ ak nimb apiy, kuyip yinek kumniᅅgambay. Kuyipmiᅅayaᅅ nembnemb geniᅅgambay, kun ak rek nep giniᅅgamb. <sup>6</sup> Gor kuyipmiᅅayaᅅ aᅅgayek woᅅg nup gi dand amyaᅅg, miᅅmon ma pikaᅅ aᅅger, ma pikniᅅgamb; n̄iᅅg gok likaᅅ tikaᅅ aᅅger, likaᅅ tikniᅅgamb; biynimb gok kuyip miker yerip yerip gok gaᅅ aᅅger, giniᅅgamb. <sup>7</sup> Pen Gor minim ak aᅅᅅni dand amiy, day jiwrikiᅅ, tap ayndik kaw kiruᅅ ma tikak biyaᅅ nimb wiᅅniᅅgamb ak, kiymiᅅayaᅅ yip penpen gi dand amiy, pisnep n̄aᅅgayek kumniᅅgayr.

<sup>8</sup> Chip par omiᅅal kun ak mindeniᅅgayr miᅅmon dawin yomb lor namb siᅅak. Dawin kun ak mey, Biyomb ak nup mon kiros bak biyoᅅ n̄aᅅgbirikayak. Biynimb miᅅmon kun ak, Sodom yip, Yiᅅip yip mindrep ma giyaᅅgipay rek ak mindpay.

<sup>9</sup> Pen biynimb miᅅmon okok keykey mindpay rek, minim keykey apay rek, wak keykey ayak rek, kuyipmiᅅayaᅅ yiruk niᅅniᅅgambay rek, chip omiᅅal kun ak ma dam komnimimb aᅅgey; kumniᅅgayr n̄in day ak tikiy, n̄in omiᅅal nokom sek n̄aᅅgayniᅅgambay tip siᅅak nep mindeniᅅgayr.

<sup>10</sup> Bi Gor minim aᅅᅅnemb omiᅅal kun ak, biynimb man ar biy ker gok kuyip, miker yomb n̄iyaᅅgpiyaᅅ rek, pen paᅅ aᅅgiy, tap yomb n̄imbiyaᅅg, kamep aᅅgyaᅅg, tap pen n̄ek pen n̄ek gi mindeniᅅgambay.

<sup>11</sup> Pen n̄in day ak sek, n̄in omiᅅal nokom sek mindiy, Gor aᅅniᅅ band ak yokek namb kuyip biyaᅅ amek tikjakrik. Kun gek niᅅiy, biynimb gok kuyip jel gak. <sup>12</sup> Pen minim bap, semb biyoᅅ nimb kuyipmiᅅayaᅅ wiyaᅅ



anġiy, suk anġek mey, biynimb ñanġep kiykmiñay gok niñmindyakniñ, Gor miñmon biyoñ amer, semb ak kuyip yiwgak.

<sup>13</sup>Pen won kun siñak nep monmon yomb sikerek ak diy, dawin yomb ak day onep anġip ak mindakniñ, day onep wanjrem ak pikjispuk giy, biynimb sepen tawsin pikayak. Pen biynimb mindeyak gok, tap gak kun ak niñiy pirikiy, Gor Biyomb semb biyoñ ak nup yimb dand aranyak.

<sup>14</sup>Pen niñim! Miker yomb nind ak gak, namb ak gip, miñiy kisen ak giniñ gisap.

### Enjol Ar Ak Biykul Nuk Pungak

<sup>15</sup>Won kun siñak nep enjol ar ak, biykul nuk ak pungakniñ, minim bap semb biyoñ nimb anġiy anġak, “Miñiy tikiy biyomb gunap key mer: Biyomb chin ak sek, Kiyñ yomb key yimb nuk ak sek kiyñ mindiy, miñmon okok mañgiysek perper kond mindeniñgayr anġak.” <sup>16</sup>Pen biyomb ñin jiwiy andikiy nokom siya kiyñ ar kiyk ak bisinġ mindeyak gok, koñgim yimiy jiy kuyangiy, Gor nup anġniñyiniñ anġyak:

<sup>17</sup>“Gor. Nand Biyomb key yimb!

Nind mindyiniñpan, miñiy mindnep mindpan!

Biyomb yimb per mindpan rek, miñiy tikiy biynimb miñmon okok mañgiysek kond mindpan ak mey, nip tep yimb aspun!

<sup>18</sup>Biyimb miñmon okok nimb nip niñiy kaljiw mindyiniñpay.

Pen miñiy kuyip yiwur ñiniñgamban ñin ak wip.

Biyimb kumyak gok kuyip, kor gep ñin ak wip ak mey; kuyip kor giy, biynimb nip direp gipay gok, minim nip anġep gok, suñ-tep mindpay gok, nip niñiy ñawil dipay gok, yimb sek mindpay akan, tam okok mindpay gok mañgiysek direp giniñgamban.

Pen biynimb monmon giy, biynimb gunap kuyip ñanġ pikaypay gok kuyip, pen kunep timey giniñgamban anġyak.”

<sup>19</sup>Kun anġyakniñ, Gor anġniñep korip semb biyoñ ak miñgan yikiy, Gor minim mindek kes won ak miseñ gek niñnik. Won kun ak nep timuk añiñak diy, giw yomb sikerek ak anġiy, miñmon niñgomb mañgiy gok pikiy, monmon apiy gak.

### Biyñ Ak Sek Ñom Nim Ak Sek

**12** <sup>1</sup>Tap key kindiknimb yomb bap, semb namb siñbiyoñ gek niñnik. Biyn bap pumb melik rek giy, takin ak tawbirikiy, gap onep wimiñgan ak, kiwiyn aypay ar band nuk ar biyoñ ayek mindek. <sup>2</sup>Pen nuk ñapan tikniñġ, ñapan ñiñakniñ wuñġ pikak.

<sup>3</sup>Tap key kindiknimb bap sek, semb namb siñbiyoñ miseñ gek niñnik. Ñom nim likañ sek, yomb sikerek ak mindek. Jun nuk onep ar ak ay, kom nuk onep wanjrem ak ay, kiyñ aypay ar band gok, jun ar keykey ay mindek. <sup>4</sup>Ñom nim kun ak, yiniñġ nuk ak gap semb biyoñ gok pikek,

kuṅaynep puṅgiw lum biy yowyak. Kun ak gap maṅgiyseḱ ṅin paṅṅ ay, day omiṅal mindakniṅ, day bap rek puṅgiw yowak. Pen nuk biyn ṅapan tikniṅ gek ak, tikek ṅiṅiyṅ aṅgiy, ap kond nep mindek. <sup>5</sup>Pen biyn kun ak ṅinuk ayin kur par ak diy, biynimb miṅmon okok maṅgiyseḱ kond mindeniṅgamb ak nup tikayek, Gor ṅinuk kun ak piliṅ diy, dand siya kiṅṅ nuk mindip ar biyoṅ amnak. <sup>6</sup>Gor biyn kun anup tip bap gayek, pirik kun okok amiy, kun okok nep mindakniṅ, Gor nup tap keṅmaṅgiy ṅiṅiyṅ kond mindeniṅgamb, ṅin wan tawsin tiw handret sikistiy amniṅgamb.

<sup>7</sup>Pen enjol yomb Maykol enjol nuk gok diy, ṅom nim ak kichekiy malṅiluk nuk gok diy penpen gi dand amiy mey, <sup>8-9</sup>ṅom nim ak kichekiy malṅiluk nuk gok sek, semb biyoṅ nimb ṅaṅgiw yokey pisnep lum biy wiyak. ṅom nim kun ak mey, Seytan nep. Nuk nep biynimb miṅmon okok kuyip tom gek, minim nup ak niṅyak.

<sup>10</sup>Pen minim yomb bap, semb biyoṅ nimb aṅgiy aṅgak:

“Kiṅṅ yomb key yimb Gor chinup yokip anep, biynimb gok kuyip kim dip. Nuk nep Kiṅṅ yomb mindip ak mey, mam ay chinup gok kuyip pumbnamb kisyimken aṅgiw mindyiṅṅip anup, mankumb biyaṅ diyokak.

<sup>11</sup>Pen biynimb Kiṅṅ yomb key yimb anup chiṅṅyak gok, Siypsiyp ṅiluk likaṅ ak gek, biynimb nuk mindpun aṅgiy, ma pirikyak; chinup ṅaṅṅniṅ ṅaṅṅniṅgiy aṅgiy, Kiṅṅ yomb key yimb anup chiṅṅiy nep mindey mey; Seytan kuyip gek, apyap pikniṅgiy rek ma ayak.

<sup>12</sup>Kun ak nimb biynimb semb biyoṅ mindpim gok, tep gakniṅ mindenimimb. Pen mankumb ak sek, solwara ak sek simb niṅep. Yenen: Seytan nup mindpim kun biyaṅ diyokey, ṅin nuk kuṅay ma mindip rek, kaljiwiw nimbip gi timey giniṅgamb aṅgak.”

<sup>13</sup>Pen ṅom nim kun ak, yip man ar biy diyokpay aṅgiy gos ak niṅiy, biyn ṅi tikak ak nup wur sek yukniṅ gek, <sup>14</sup>Gor nup yakir duk pilkind rek yomb omiṅal ay ṅek, wiṅind miṅmon nep namb okok amnak. Am kun okok mindakniṅ, nup kond mindek, ṅin wan tawsin tiw handret sikistiy amniṅgamb.

<sup>15</sup>Pen ṅom nim yomb ak, ṅiṅṅ wilik rek wokyoken, biyn kun ak nup woṅind amnaṅ aṅgiy, wokak ak pen, <sup>16</sup>Gor gek ṅiṅṅ kun ak man miṅṅan okok paṅṅ amiy, kur kur gek amnak. <sup>17</sup>Kun gek, ṅom nim ak milukrimey yimb yapek, biyn kun ak ṅapan tikayep nuk gok, Jiysis nup chiṅṅiy, Gor minim kindik giy gipay gok yip penpen giniṅṅ, <sup>18</sup>am ṅiṅṅ solwara gol siṅak jak mindek.

### Tap Ayndik Bap ṅiṅṅ Solwara Namb Okok Nimb Arachakak

**13** <sup>1</sup>Mindakniṅ niṅnik: tap ayndik rek bap, ṅiṅṅ solwara namb okok nimb mindiy, arachakak. Jun nuk onep ar ay, kom onep wanjrem

ay gak. Bi kiyn aypay ar band onep wanjrem ak, kom day keykey ay mindek. Pen jun nuk onep ar ak, Gor nup anjjiwep yimb gunap tikayey mindek. <sup>2</sup>Tap ayndik kun ak, kayn kasek tangip “lepet” apay rek ak pen; tomb nuk gok, kayn beya tomb kilis rek ayak; menjg minjan nuk ak, kayn layon menjg minjan rek ayak. Pen nom nim ak, tap kun anup bak ay mindiy angek, tip nup ak diy, biyomb mindiy, biynimb kuṅay yimb nep kuyip kond mindiyng gek amnak. <sup>3</sup>Jun nup bap, nind pisnep nangayey kalaw gak rek ayak ak pen; tip ak suṅ ayak. Kun gek, biynimb man ar biy manjiysek gos gos ay, nup kindik giyak. <sup>4</sup>Bi kun biy biyomb key yimb mindip; biynimb gunap nuk yip penpen giniṅgiy rek ma ayip anjgiy, nup lotiw rek giyng, minim nup ak kindik giyak. Pen nom nim ak, nup bak ayek biyomb mindek ak mey, nup sesek lotiw giyak.

<sup>5</sup>Pen Gor tap ayndik kun anup ninen kirgek, nin wan tawsin tiw handret sikistiy ak, biynimb gok kuyip kond mindiy; Gor nup anjjiwyng; yimb nuk key dand aranyng gi mindek. <sup>6</sup>Nuk kun giy Gor nup anjjiwi, miṅmon nup mindip biyong anjjiwi, biynimb nuk yip mindpay gok kuyip anjjiwi gak. <sup>7</sup>Pen Gor nup ninen kirgek, biynimb tep nuk gok yip penpen giy, nangjiwyokiy, biynimb okok manjiysek: miṅmon keykey, kiṅṅ keykey, minim yimb keykey, wak keykey ayak rek kuyip kond mindek. <sup>8</sup>Biyomb manjiysek rek, tap ayndik kun anup lotiw giniṅgambay. Pen biynimb siṅok: miṅmon ma alwol gayak nin ak, Gor per mindeniṅgambay anjgiy, yimb kuyip Siypsiyp Niluk kumak buk yomb nup biyan tikayak gok nep, tap ayndik kun ak nup, lotiw ma giniṅgambay.

<sup>9</sup>Biyomb gos timund sek mindenimimb gok, Gor minim anjip kun biy niṅnimimb! <sup>10</sup>Biyomb Gor kalambis amniṅgiy anjgiy niṅimb gok, kalambis amniṅgambay. Biynimb baynat diy piṅiyey kumniṅgiy anjgiy niṅimb gok, baynat diy piṅiyey kumniṅgambay. Kun giniṅgamb rek, Gor biynimb nuk gok ma apyap pikjun anjgiy, nup gosimb niṅyng, chingrep giy mindiyng mey, ma apyap pikniṅgambay.

### **Tap Ayndik Bap Pen Lum Namb Akyan Nimb Arachakak**

<sup>11</sup>Pen tip ak niṅiy niṅnik: tap ayndik rek bap sek, man namb akyan nimb arachakak. Kom nuk omiṅal ak, siypsiyp niluk kom rek ayak ak pen; minim nuk ak, nom nim rek angak. <sup>12</sup>Nuk tap ayndik nindnimb anup wong giṅiyng, biynimb miṅmon okok manjiysek nembnemb gek, tap ayndik nindnimb baynat piṅiyey mey kumak ak pen, tip mindek kun anup, lotiw rek giyak.

<sup>13</sup>Tap ayndik nindnimb ak, tap ayndik kisenimb ak nup bak ayakniṅ, tap mageprek kuṅaynep gak. Biynimb niṅmindyakniṅ, nuk gek, mon maṅṅak ak semb biyong nimb man biy wak. <sup>14</sup>Biyomb mankumb biy nimb gok niṅmindyakniṅ, kuyip yesek tom giyn anjgiy, tap mageprek kun gok

gek, niñind nep aŋgip aŋgiy niñyak. Pen bi kun ak, biynimb mankumb biy kuyip maŋgiysek aŋgak, “Tap ayndik baynat piñiyey mey kumak ak pen, tip mindip ak nup yimb dand araniŋ,” tap nup rek bap gaynimimb aŋgek,” tap kun ak rek bap gayak. <sup>15</sup>Pen Gor tap ayndik ak nup ñinen kirgek, tap gayak kun ak nup, añiñ band ak puŋgek amek, kim mindiy, minim aŋgiy aŋgak, “Yand biyomb. Yip nep lotiw ginimimb aŋgak.” Kun aŋgek, biynimb nup ma lotiw giyak gok, maŋgiysek aŋgek ñaŋgdiyak. <sup>16</sup>Nuk biynimb yimb mindek gok, yimb ma mindek gok; maniy kuŋay mindek gok, maniy ma mindek gok; kalambis woŋg giyak gok, yikop mindeyak gok kuyip maŋgiysek, yand nimbip kond mindpiyn rek, kil yip ak dinimimb aŋgek, maŋgiysek rek kil nup ak diyak. Gunap kil nuk kun ak ñin yipund kind ak diyak, gunap awinbeŋ biyoŋ diyak. <sup>17</sup>Pen biynimb kil nup kun ak ma diyak gok, tap tawniŋ akaŋ, sikiyim giniŋg, giniŋgiy rek ma ayak. Kil kun ak mey, yimb akaŋ namba nuk ak.

<sup>18</sup>Biynimb gos tep niŋbay gok, minim junj kun ak, piyow niŋniŋgiy rek mindip. Niŋrep giy mey; tap ayndik rek kun ak, namba nuk junj ak niŋniŋgambay. Namba kun ak, bi bap yimb nuk ak mindip. Namba kun ak mey 666.

### **Biynimb Kuŋaynep Kamep Kisenimb Bap Aŋgyak**

**14** <sup>1</sup>Pen tip ak niñiy niñnik: Siypsiyp Ñiluk ak Sayon dum biyoŋ jakiy mindakniŋ, biynimb wan handret powtiy pow tawsin gok nuk yip mindeyak. Biynimb nuk yip mindeyak kun gok, awinbeŋ kiyk biyoŋ maŋgiysek yimb nuk ak sek, Nop yimb ak sek tikayey mindek. <sup>2</sup>Pen minim bap, semb biyoŋ nimb ñiŋg sinj yomb piñiy giw aŋgip rek akaŋ, timuk giw parsek aŋgip rek ak aŋgek niñnik. Minim tep kun ak, giyta pikambay aŋgip rek ak aŋgak. <sup>3</sup>Pen tap pilkind onep kaŋgol ayak gok sek, bi minim tuŋgasikep gok sek siya kiyŋ nup ak piñiy kus gi mindyakniŋ, biynimb wan handret powtiy pow tawsin gok kuyip di namb ay, kamep aŋgyak. Kamep kun ak kisenimb; biynimb lum ar biy nimb yikop gok niŋniŋgiy rek ma ayak; biynimb wan handret powtiy pow tawsin Gor dak kun gok nep niŋniŋgiy rek ayak. <sup>4</sup>Biynimb kun gok mey, mind tep giy suŋ nep mindiy, Siypsiyp Ñiluk ak yip nep tapay. Krays kuyip biynimb yikop namb okok nimb diy, dand Nop ker awak rek, kiyk tap marip kisenimb gunap pipanŋ dapiy, Gor apiymiŋay kuyip simboŋg ñey, dipiyr rek ak mindpay. <sup>5</sup>Gor minim niñind nuk ak kisen gun aŋgiy; suŋ-tep mindpay.

### **Enjol Omiŋal Nokom Minim Aŋgñiyak**

<sup>6</sup>Pen tip ak niñiy niñnik: enjol bap semb namb siŋbiyoŋ wiñind taŋyŋiŋg, Gor minim tep per mindeniŋgamb ak, biynimb man ar biy, wak keykey ayak rek, minim yimb keykey apay rek, miñmon keykey mindpay

rek, 7kuyip suk yomb anġiy anġak, “Kor yomb giniġgamb ñin ak wip rek, Gor nup jel pirikiy, nuk Biyomb semb biyoŋ, man biy, ñiŋg solwara, ñiŋg key paŋġjakip gok maŋġiysek gayak anġiy, yimb nup ak dand aranimimb anġak.”

8Enjol bap, enjol nind ak nup kisen giyiŋg anġak, “Gor gek miñmon yomb Babilon pisnep apyap pikip-ow! Binuk dinimuŋ ak mindakniŋ, bi yesek gok siy di mindip. Pen ñiŋg wayn kilis nuk ñiŋimb ak, biynimb miñmon keykey gok kuyip ñek ñimbey, nuk gip rek, sakiy giy nep gipay anġak.”

9Enjol bap pen, enjol nind omiŋal ak kuyip kisen giy, suk yomb anġyiyŋg anġak, “Biyimb tap ayndik anup lotiw giyiŋg, tap nup rek niŋiy gayak ak nup lotiw giyiŋg, kil nup ak awinbeŋ biyoŋ akan, ñin ar siŋak diniŋgambay gok, 10Gor nup miluk yimb yapek, ñiŋg wayn silik yimb ak, kap kuyip biyaŋ paŋgek aranjakek, ñek ñiniŋgambay. Siypsiyp Ñiluk ak sek, enjol suŋ-tep nuk gok sek niŋmindyakniŋ, kuyip anġ mon key yinjap ak yokek, mon maŋlaŋ salpa sek ak kuyip yinakniŋ wuŋg pikmindeniŋgambay.

11 Mon sikum kun ak, perper nep araniŋgamb. Kun ak, biynimb tap ayndik ak nup lotiw giyiŋg, tap nup rek niŋiy gayak ak nup lotiw giyiŋg, kil nup diniŋgambay gok, Gor kuyip pen, yiwur yomb ak pumbnamb kisyimken ñiniŋgamb anġak.” 12Kun ak, chin biynimb Gor anġip rek giyiŋg, Jiysis nup gosimb niŋbun gok, Gor apiymiŋay kuyip chiŋgsep giy gon amnimuŋ.

13Pen minim bap, semb biyoŋ nimb yip anġak, “Minim anġniŋg gispiyn biy tikaynimin. Miñiy miker gip ñin biy, biynimb Gor nup chiŋgiy kumniŋgambay gok kuyip, tep yimb giniŋgamb anġak.” Anġek, Gor Kawnan ak anġak, “Niŋind yimb. Kiyk miker diyiŋg woŋg kosyam gipay rek, Gor niŋimb ak mey, nuk anġek am nuk yip aŋiŋ ay, miñmiñ giyiŋg mindeniŋgambay anġak.”

### Tap Woŋg Man Ar Biy Wos Gip

14Pen niŋnik: Bi bap Ñinuk rek ak, semb tund band ar ak biŋiŋg mindek. Jun nuk biyoŋ, bi kiŋy aypay ar band ak ay, ñayip goŋgemb kindrimey wiyt maŋġiy tik dand opay rek bap di mindek.

15Pen enjol bap, Gor anġniŋep korip miŋgan biyaŋ nimb apiy, bi semb namb siŋak biŋiŋg mindek anup, suk yomb anġiy anġak, “Lum ar biyaŋ wiyt maŋġiy gok maŋġiysek pik gip. Wiyt tik dand owep ñin ak wip rek, ñayip nand kun ak diy, tikninin anġak.” 16Anġek, bi semb namb siŋak biŋiŋg mindek ak, ñayip nuk ak diy, wiyt maŋġiy lum ar jakak gok maŋġiysek tikak.

17Enjol bap pen, ñayip goŋgemb bap diy, Gor anġniŋep korip miŋgan semb biyoŋ nimb mis owak.

18Won kun ak nep, enjol mon maŋlaŋ kond mindyiŋgip ak, Gor nup tap simboŋep bind ar ak nimb apiy, enjol bap nup suk yomb anġiy anġak,

“Wayn maŋgiy lum ar biyaŋ nimb gok pik gip rek, maŋgiysek tik dap nan-ginimin aŋgak.” <sup>19</sup>Kun aŋgek, enjol kun ak, ñayip goŋgemb nuk ak diy, wayn maŋgiy gok tikdam, Gor nup miluk yapek, wayn maŋgiy tawsimbjakip kiwok miŋgan ak yokak.

<sup>20</sup>Miŋgan kun ak yokek tawsimbjakakniŋ, likañ ak tan aranjakiy, ñiŋg wilik yomb apyowip rek wiw aŋg apyapyiŋg, chiriy handret tiwendiy (320) kiylowmiyta rek amnak.

### Enjol Gok Geniŋgambay Miker Yomb Keykey Onep Ar Ak Giniŋgamb

**15** <sup>1</sup>Pen tap key kindiknimb niŋiy wal aŋgep rek bap sek, semb namb siŋbiyoŋ gek niŋnik. Gor nup miluk yimb yapek, miker onep ar ak gek, pisnep day jiwningamb aŋgiy, enjol nuk onep ar ak kuyip aŋgayek, miker yomb kun gok, dand lum biy winiŋg geyak.

<sup>2</sup>Pen kiñiŋ kun siŋak niŋnik: ñiŋg chemb bap rek, mon maŋlaŋ sek yiŋgoŋg giy, galas rek kind yimb aŋgiy mindek. Biynimb tap ayndik ak sek, tap nup rek gayak ak sek, yimb nup namba ak sek asikrep giy, minim nup taw achip giyak gok; gol kun siŋak mindeyak. Gor kuyip giyta keykey ñek; <sup>3</sup>bi Mosis Gor nup woŋg giñiyiŋgip minim ak sek, Siypsiyp Ñiluk minim ak sek aŋgyiŋg, kamep aŋgiy aŋgyak:

“Gor. Nand Biyomb key yimb. Woŋg nand ma ginimin rek bap ma mindip; yerer giniŋg giniŋgamban.

Nand Biyomb miñmon okok maŋgiysek kond mindpan ak mey, yipund giy ar ak nep gipan.

<sup>4</sup>Biynimb maŋgiysek nip niŋiy, ñawil diniŋgambay.

Nip Biyomb aŋgiy, yimb dand araniŋgambay.

Nand miñ yipund giy ar ak nep gipan ak niŋiy, miñmon okok maŋgiysek ap nip aŋgniŋniŋgambay aŋgyak.”

<sup>5</sup>Kisen pen niŋnik: Gor aŋgniŋep korip semb ar biyoŋ ak miŋgan yikiy, Gor ser korip ak miseŋ mindek. <sup>6</sup>Enjol onep ar ak, biynimb man ar biy gok kuyip, miker yomb ñiniŋg, Gor aŋgniŋep korip miŋgan biyaŋ nimb mis wiyak. Enjol kun gok, chech tund tep ñiñakol gak gok nep aydiy, ler kamb gol diy giyak gok, kond namb ak aybirikiy owyak. <sup>7</sup>Tap pilkind onep kaŋgol ayak gok, bap ap enjol onep ar ak kuyip, diys keykey ñak. Diys miŋgan kun gok, Biyomb perper mindeniŋgamb ak, biynimb mindrep ma gey miluk niŋimb minim yomb ak arachakiy mindek. <sup>8</sup>Gor Biyomb jel gip ak mey, minim yomb nuk kun ak mindakniŋ, aŋgniŋep korip miŋgan ak sikum arachakiy mindek; biynimb bap miŋgan kun ak, amniŋgiy rek ma ayak. Enjol onep ar ak, miker yomb biynimb ñiniŋg geyak gok ñidiy nep, korip miŋgan kun ak amniŋgiy rek ayak.

### Enjol Miker Yomb Onep Ar Ak Dand Wiyak

**16** <sup>1</sup>Pen day niŋiy niŋnik: minim bap Gor aŋgniŋep korip miŋgan biyaŋ nimb enjol onep ar ak kuyip, suk yomb aŋgiy aŋgak,

“Biyimb timey gipay rek Gor miluk yapek, kuyip miker ñining, diys onep ar tumb biyoŋ aranjakiy mindip gok, dam lum ar biyaŋ songem amnaŋ angak.”

<sup>2</sup>Kun aŋgek, enjol nind ak diys nuk dam lum ar biyaŋ songek, biynimb tap ayndik kil nup ak diy, tap nup rek gayeyak lotiw giyak gok, kuyip soy ayndik yiwur yomb sikerek gak gok ayak.

<sup>3</sup>Enjol namb ak, diys nuk dam ñiŋg solwara ar ak songek, ñiŋg solwara ak, biynimb ñaŋgey likaŋ wip rek ak ay, tap ñiŋg solwara namb kun okok mindeyak gok, maŋgiysek kumdiyak.

<sup>4</sup>Enjol namb kanenŋ ak, diys nuk dam ñiŋg kilam jiwip gok sek, yikop apyowip ar gok sek songek, ñiŋg gok maŋgiysek likaŋ ayak. <sup>5</sup>Pen enjol ñiŋg maŋgiysek kond mindip ak angak, “Gor. Nand kuyip niŋind yimb kun gipan. Nand Bi suŋ-tep yimb. Nind yimb yimb mindiy, mind dand apiy, mindnep mindpan. <sup>6</sup>Biyimb kun gok nep mey, biynimb nip ker gok kuyip pikay, bi minim nip aŋgep gok kuyip, ñaŋgayey likaŋ yowak ak mey, kuyip pen kunep likaŋ ñey ñimbsipay ak, giy dispay angak.” <sup>7</sup>Kun aŋgek, minim bap Gor nup simboŋgep bind ar ak nimb angak, “Gor. Nand Biyomb yimb; biynimb tap okok maŋgiysek kond mindpan. Biynimb gok kuyip yiwur ñimban ak, gipay rek niŋiy, pen kunep gipan angak.”

<sup>8</sup>Enjol tiŋgawip ak, diys nuk dam pumb anup songek, biynimb gok kuyip sinjrimey yimb niŋnimuŋ rek ayak. <sup>9</sup>Sinjrimey yimb niŋiy, kuyip tapin yinak ak pen; yenen timey gipun aŋgiy mindrep giy, yimb nup ak ma dand araniyak. Chinup miker ñisap aŋgiy, nup aŋgiwyak.

<sup>10-11</sup>Enjol mamind ak, diys nuk dam tap ayndik siya kiŋŋ mindek ar siŋak songek, biynimb nuk kond mindyiŋgip namb ak, kisyim yiwiŋg dak. Soy ayndik ay, yiwur yomb gek, alemb siwbirikyak ak pen; timey giyak ar ak ma kirgiyak; giyiŋg nep mindiy, Gor semb biyoŋ nup aŋgiwyak.

<sup>12</sup>Enjol kaŋgol ak, bi kiŋŋ yomb miŋmon pumb limgip okok nimb ap, Siypsiyp Ñiluk ak yip penpen giŋiŋgambay ñin ak wip rek, ap penpen giŋiŋgiy aŋgiy, diys nuk ak dam ñiŋg yomb Yiwpreytiys songek, ñiŋg kun ak pisnep milip gak.

<sup>13</sup>Kun gakiŋŋ, malñiluk as rek ayak omiŋal nokom niŋnik. Bap ñom nim meŋg miŋgan ak nimb aranjakak; bap tap ayndik meŋg miŋgan ak nimb aranjakak; bap bi Gor minim aspiŋ aŋgiy, yesek nep aŋgŋiŋgamb ak meŋg miŋgan biyaŋ nimb aranjakak. <sup>14</sup>Malñiluk kun gok, Seytan ñapan nuk yimb ak mey, tap mageprek gok giŋiŋgiy rek ayak. Gor ñin yomb nuk ak, giŋiŋgamb rek niŋiy niŋnik; kiyk am kiŋŋ miŋmon keykey mindpay rek amiy, kuyip poŋind apiy, Gor bi tap okok maŋgiysek alwol gayak ak yip penpen gey amnak.

<sup>15</sup>“Niŋrep ginimimb! Yand winiŋg, bi tap siydep gok ma niŋmindpay won ak, opay rek ak winiŋgayn! Kun ak mey, biynimb wisin ma kiniy,



chech ayrep giy mindeningambay gok kuyip, nambiy ma giningamb; kuyip den miñmiñ giningambay!”

<sup>16</sup>Pen malñiluk kun gok, bi kiyn miñmon keykey gok kuyip, dap nangingambay miñmon ak, Hiybriw minim angyi Amagedon apay.

<sup>17</sup>Enjol ar ak, diys nuk ak songgak namb nep ar bikyon. Songek, minim bap siya kiyn Gor angnep korip miñgan biyan nimb suk yomb angyi angak, “Miker yomb gok day jiwip angak.” <sup>18</sup>Kun angakniñ, timuk angyi giw angek amnakniñ, añiñak diying kasin mangyi bol gok yap pikiy, monmon yomb sikerek biynimb mankumb biy, nind ma niyngipay rek bap awak. <sup>19</sup>Monmon yomb sikerek kun ak diy, dawin yomb Babilon ak biw angyi, asik taw omiñal nokom ay, dawin yomb miñmon keykey okok mangyisek, korip tap gok punjjiw kosiy masiy gak. Gak kun ak, Gor nup miluk yimb yappek, Babilon biynimb giyak ak sakiy ma giy, kuyip niñg silik kap tumb biyon aranjakak ak, ñek niñyak. <sup>20</sup>Pen miñmon sikoy niñg timb kus gak gok sek, miñmon yirik gok sek pisnep kurgak. <sup>21</sup>Miker yomb yimb ak mey, dikiy niñgomb mangyi yomb sikerek gok semb biyon nimb yapiy, biynimb gok kuyip sinjrimy yimb pikak. Kuyip sinjrimy yimb pikek niñy, Gor nup pisnep angyiwyak.

### Kinjeñram Biyn Yomb Rek Bap Yiwur Yomb Diningamb

**17** <sup>1</sup>Enjol onep ar miker keykey dand wiyak gok, bap ap yip angak, “Biy apey, nip yomen niñan! Biynimb gok kuñaynep niñg rek mindey, kinjeñram biyn rek bap, niñg kas ar kun ak mindip. Pen Gor nup yiwur yomb niñingamb rek, nip yomiyn. <sup>2</sup>Bi kiyn miñmon keykey mindpay rek, kinjeñram biyn kun ak yip girangying, biynimb lum ar biy yikop gok kunep, niñg wayn timey nuk ñimb ak ñimbey, kuyip sakiy ayip angak.”

<sup>3</sup>Pen Gor Kawnan ak yip goñ ayakniñ, enjol ak yip dand miñmon nep namb okok amek niñnik: biyn bap, tap ayndik likañ bap ar biyon bising mindek. Tap ayndik kun ak, mumbwak nuk okok, yimb Gor nup angyiwep gok, kuñay yimb nep tikayey mindek. Jun nuk onep ar ak ay, molond onep wanjrem ak ay gak. <sup>4</sup>Pen biyn rek niñnik kun ak; chech likañ biyn yomb aypay rek ay, gol gunap, biys teprep maniy yomb tawpay gunap mumbwak nuk okok mangyisek ayak. Kap gol diy giyak bap di mindek. Kap miñgan kun biyan, tap gach tap timey nuk gak gok aranjakiy mindek. <sup>5</sup>Awinbeñ nup biyon, minim wegyi mindyngip bap tikiy angyak, “Dawin yomb yimb Babilon biynimb bi yesek gok yip girapay gok, biynimb timey yimb gipay gok, nonim kiyy yimb angyak.” <sup>6</sup>Pen niñnik: biyn kun ak, biynimb Gor nup direp giyak gok pikay, biynimb Jiysis nup gosimb niñy misen angyak gok kuyip pikay gi dand amiy, pisnep sakiy ayak. Gak kun ak niñy, jiwdiy gos par aynik.

<sup>7</sup>Pen enjol ak yip angak, “Yenen jiwdiy gos par aysipan? Tap ayndik jun onep ar ay, molond onep wanjrem ay gip ak sek, kinjeñram biyn



tap ayndik ar biyoŋ bisgiy, nup dand taŋgip ak sek minim kiñiŋ ak, nip aŋgñiniŋ gispiyn. <sup>8</sup>Tap ayndik niŋamban kun ak, nind mindyiŋgip; miñiy ma mindip; pen maŋ mindip; nuk kaw miŋgan kiruŋ ma tikak biyaŋ nimb apek, Gor gek pisnep kurginiŋgamb. Gor miñmon ma alwol gayak ñin ak, biynimb lum ar biy diniŋgayn aŋgiy niŋak gok, yimb tikayak buk nuk biyaŋ. Pen biynimb yimb kuyip ma tikayak gok, tap ayndik kun ak tip mindek niŋiy, wal yimb aŋgñiŋgambay. Yenen, nuk nind mindyiŋgip, miñiy ma mindip ak pen, kisen tip ak mindeniŋgamb.

<sup>9</sup>“Minim kun gok niŋrep giy nep mey, niŋbay. Tap ayndik jun nuk onep ar bineŋ mindamb niŋambur ak, minim kiñiŋ ar omiŋal mindip. Bap yirik keykey onep ar ak; bap kiŋy keykey onep ar ak. Yirik kun gok, yirik siŋok, kinjeŋram biyn beŋ nup okok mindpay gok apiyn. <sup>10</sup>Kiŋy kamb kun ak, onep mamind ak nind kiŋy mindiy apyap pikdeyak, miñiy kaŋgol ak kiŋy mindip. Nuk apyap pikeniŋgamb, kiŋy ar ak pen tip nup ak diy, sikoy won bap nep, biynimb gok kuyip kond mindeniŋgamb. <sup>11</sup>Pen tap ayndik, nind mindyiŋgip ak miñiy ma mindip rek, nuk key kiŋy jiy bineŋ mindip. Nuk mey, kiŋy onep ar ak nimb bap. Nuk kiŋy mindeniŋgamb ñin ak, Gor gek pisnep apyap pikniŋgamb. <sup>12</sup>Pen molond onep wanjrem niŋamban gok, kiŋy onep wanjrem biyoŋ. Kiyk miñiy ma mindpay ak pen, kisen Gor gek kiyk biyomb kiŋy mindiy, tap ayndik ak yip woŋg giyiŋg, biynimb gok kond mindeniŋgambay. <sup>13</sup>Yenen kiyk gos ar nokom niŋiy, tap ayndik ak nup aŋgey, tip kuyip ak diy, biynimb gok kuyip won bap nep kond mindeniŋgamb. <sup>14</sup>Kiŋy kun gok, Siypsiyp Ñiluk ak yip penpen giniŋgambay ak pen, nuk kiŋy gok maŋgiysek, biyomb gok maŋgiysek kiŋy yomb kiyk mindip rek; nup ñaŋg pikayniŋgiy rek ma aŋniŋgamb. Biynimb nuk key niŋiy suk aŋgiy dip gok, nup chiŋgiy nep mindeniŋgambay rek, nuk yip kiŋy yikop kun gok kuyip wiyniym giniŋgambay.”

<sup>15</sup>Pen enjol kun ak yip aŋgak, “Ñiŋg siŋok kinjeŋram biyn biŋiŋg mindamb niŋamban ar ak mey, biynimb wak keykey ay, minim yimb keykey aŋgiy, miñmon keykey mindpay rek ak niŋban. <sup>16</sup>Molond onep wanjrem niŋamban gok sek, tap ayndik ak sek kinjeŋram biyn ak nup miluk yimb niŋiy, tap nup gok maŋgiysek piliŋ deniŋgambay mey, daynep mindeniŋgamb. Pen mumbwak nup ak ñimbiy, day day mindeniŋgamb gok, daŋgiyey yinsimbok amniŋgamb. <sup>17</sup>Yenen: Gor kuyip gos ñek, gos ar nokom niŋiy, tap ayndik ak nup aŋgey, tip kuyip ak diy gek amek mey, Gor giniŋgamb aŋgiy aŋgayak rek nep giniŋgamb. <sup>18</sup>Pen kinjeŋram biyn niŋamban kun ak, nuk mey dawin yomb yimb rek. Nuk minim aŋgek, kiŋy miñmon keykey mindpay gok niŋiy, kindik gipay.

### Babylon Yap Pikniŋ Gisap

**18** <sup>1</sup>Pen day niŋiy niŋnik: enjol Gor aŋgek biyomb yimb mindek bap, semb biyoŋ nimb apek, melik tep nuk ak gek, mankumb

biy maŋgiysek melik gak. <sup>2</sup>Apiy suk yomb aŋgiy aŋgak, “Miñmon yomb Babiylon yap pikniŋ gisap-ow! Yap pikniŋ gisap-ow! Gor gek dawin yomb kun ak, biynimb bap ma mindeniŋgamb; kum koyimb, kichekiy malñiluk, yakir timey, kayn aydik tap gok nep mindeniŋgamb. <sup>3</sup>Yenen: binuk dinimuŋ ak kirgiy, bi yikop gok yip giranŋgiy, biynimb miñmon okok gos kun ak nep ñimb. Niŋ wayn nuk ñinimb ak, biynimb gok kuyip kunep ñek ñimbiy, sakiy aypay. Kiyŋ man ar biy gok, nuk yip giranŋgiy, timey nep gipay. Pen nuk tap teprep gok diyn aŋgiy per gos niŋimb rek, bi man ar biy biysniys gipay gok maniy yomb dipay aŋgak.”

<sup>4</sup>Pen niŋnik: minim bap semb biyoŋ nimb aŋgak, “Biynimb yand gok am, Babiylon kuyip ma wiliknimimb. Tap siy tap timey kiyk gipay gok, nimb yip ma ginimimb. Yiwur yomb kiyk diniŋ gispay ak, nimb yip ma dinimimb. <sup>5</sup>Gach yomb kiyk ak, tap ason rek aran mindip ak mey, Gor kuyip gipay kun ak sakiy ma giniŋgamb. <sup>6</sup>Nuk timey gipay rek niŋiy, pen yiwur ñiniŋgamb. Babiylon nuk biynimb gunap kuyip, ñiŋ silik ñimb rek, Gor nup pen kunep, ñiŋ silikrimey yimb ak ñek ñininiŋgamb.

<sup>7</sup>“Tap kuŋay nep diyn aŋgiy, yimb nuk key dand aranimb rek, yiwur yomb diy, apyap pikniŋgamb. Nuk aŋgip, ‘Yand biyn yandiw rek ma mindpiyn: yand biyn kiwiyn ak mey, siya yomb ar ak biŋiŋ mindpiyn. Miker gunap yip dinimuŋ rek ma ayip aŋgip.’ <sup>8</sup>Kun aŋgip ak pen, bi nup yiwur ñiniŋgamb ak, Biyomb yimb mindip. Nuk gek yiwan yomb apiy, miñak yomb giy, mon yiniy, siy yomb aŋniŋgamb.

<sup>9</sup>“Dawin yomb mon yiniŋgamb kun ak, sikum araneŋ niŋiy, kiyŋ miñmon okok nimb biyn kun ak yip giranŋgiy gipay gok, simb gek siy aŋniŋgambay. <sup>10</sup>Biyn ak nup yiwur giniŋgamb kun ak, chinup kunep ginimuŋ rek ayip aŋgiy, keykey siŋbindoŋ mindiy, siy aŋgiy aŋniŋgambay, ‘Mer-a! Dawin yomb kun ak, yep won biy nep pisnep yap pikip aŋniŋgambay.’

<sup>11</sup>“Pen yap pikniŋgamb rek, bi biysniys gipay gok, miñiy biynimb gok tap chinup ma tawniŋgambay aŋgiy, simb gek siy aŋniŋgambay. <sup>12-13</sup>Tap kiyk kun gok mey: gol, siylpa, kamb sikoy teprep keykey gok, chech napnap teprep keykey gok; tap kuyrep wip keykey gok; mon pilaŋ teprep gok; tap ayen, kapa, mon, kanj eliypend meŋ tap gok diy gipay gok; ñiŋ wayn, oliyp wel, wiyt maŋgiy, pilaw tap gok; kanj makaw, siypsiyp, hos gok; tap kanj hos tiwningey lipiŋ dand tapay gok; pen biynimb yimb yipund giy miñ tiwning dand amiy, maniy dipay gok sek.

<sup>14</sup>“Pen Babiylon nup aŋniŋgambay, ‘Maniy siyŋ diniŋ gipan ak, ma diniŋgamban. Gol maniy tap gok pisnep yap amimb; kisen tip ak, ma diniŋgamban aŋniŋgambay.’

<sup>15</sup>“Bi Babiylon yip biysniys gipay gok, Babiylon yiwur yomb dip ak, chinup kunep ginimuŋ rek ayip aŋgiy, gol okok am niŋmindiŋ, siy aŋgiy aŋniŋgambay, <sup>16</sup>‘Mer-a! Dawin yomb kil tep kun ak, chech

teprep likañ gok ay, gol, biys teprep maniy yomb tawpay ak sek ay gip ak pen, <sup>17</sup>won siñbiy nep, tap teprep kun gok pisnep kurgip angningambay.’

<sup>18-19</sup>“Bi siyip dand tanjep gok sek, bi boskil kiyk gok sek, biynimb siyip ar tapay gok sek keykey siñbindoñ mindiy, silkul diy, jun ar kiyk biyoñ diyokiyng angningambay, ‘Babiyon nep dawin yomb yimb ak pen, miñiy pisnep timey gip. Nuk mindakniñ, gol maniy tap gok kuñaynep mindek, siyip girangyiyng tap kuñaynep dipun ak pen; miñiy won biy nep kurgip rek, chin biynimb siyip tapun gok, maniy woñg chin ma mindip angningambay.’

<sup>20</sup>“Pen kinjenram biyn nimbip biynimb Gor ker mindpim gok timey gip ak, Gor niñimb ak mey; nup pen yiwur yomb yimb ak ñiningamb. Biynimb Gor yip mindpay gok, miñmiñ giniñgiy. Gor biynimb nuk gok sek, bi minim anjep nuk gok sek, bi minim tep nup dand amemb gok sek miñmiñ giniñgiy angak.”

<sup>21</sup>Won kun ak, enjol kilis yimb bap, kamb yomb sikerek bap di ñing solwara namb ak diyokek, giw yomb angakniñ angak, “Dawin yomb Babiyon, kamb diyoken kurgip rek ak giniñgamb. Kisen tip ak ma mindeniñgamb. <sup>22</sup>Babiyon biynimb tep gakniñ kamep angyiyng, gawimb, giyta, dachiy tap gok pikiyng ma mindeniñgambay. Woñg ar keykey gipay rek, ma giniñgambay. Wiyt mañgiy piksimbjakiy pilaw gipay rek, ma giniñgambay. <sup>23</sup>Biynimb lam melik namb kun ak, tip ma niñniñgambay. Biyn bi namb kun ak, ma diniñgambay. Dawin yomb kun ak, pisnep kurginiñgamb. Bi sikyim gep kiyk gok, biyomb yimb mindpay. Pen dawin yomb kun ak kunj giy, yesek angyiy gey, biynimb okok mañgiyseki nep kuyip kisen gipay.

<sup>24</sup>‘Babiyon biynimb gok nep, Gor biynimb nuk gok kuyip ñangiy, bi minim nup anjep gok ñangiy gipay. Biynimb man ar biy ñapay gok mañgiyseki, junj ak mey Babiyon nep. Kun gip rek, Gor nup pen, yiwur yomb yimb ak ñiningamb angak.’ ”

**19** <sup>1</sup>Pen day niñnik kun ak, biynimb kuñaynep semb biyoñ miñmiñ giyiyng meñg miñgan dand araniy angyak, “Gor nuk Biyomb yimb! Biynimb nuk tungsak dip gok nep, kim amniñgambay. Chinup kond mindip rek, yimb nup dand yiy ar biyoñ aranjun. <sup>2</sup>Niñrep giy nep, biynimb gok kuyip yiwur ñimb. Kinjenram biyn kun ak, Gor nup kirgiy monmon giyiyng, biynimb nup gok kuyip pikayiyng gek, biynimb miñmon okok kuyip kinjen yomek, kunep giyak ak, nup niñind yiwur yomb yimb ak ñimb angyak.”

<sup>3</sup>Kun angyiy, tip ak meñg miñgan dand araniy angyak, “Gor nup yimb dand aranjun! Dawin yomb Babiyon yiwur dakniñ, sikum ak perper nep aranimb angyak.”

<sup>4</sup>Kun angyeyak, bi minim tungasikep ñin jiwiy andikiy nokom gok sek, tap pilkind onep kanjol ayak gok sek Gor siya kiyn ar bisiyng mindek

kiñiñ sijak kongim yimiy angyak, “Niñind yimb! Yimb nup pernep dand aranjun angyak.” <sup>5</sup>Kun angyek, minim bap siya kiyn mindek sijak nimb angyi angak, “Nimb biynimb yomb akan, biynimb tam okok akan, yerip rek mindiy pen, Gor nup biyomb yimb angyi pirikiy, direp gipim gok; yimb nup ak dand aranimimb angak.”

**Krays Biynimb Nuk Yimb Gok Kuyip Dand Miñmon  
Nuk Amek, Miñmiñ Giniñgambay**

<sup>6</sup>Kun angakniñ niñnik: biynimb kuñaynep ñiñg sinj piñiy angyip rek akan, timuk angakniñ giw yomb angyip rek angyiñg angyak, “Gor nup yimb ak dand aranjun! Nuk miñiy biynimb gok kuyip mangyisek kond mindip. <sup>7</sup>Kun ak tep gakniñ miñmiñ giyng, yimb nup ak dand aranjun. Yenen: Siypsiyp Ñiluk ak biynuk nup diniñgamb ñin ak wip rek, biyn ak korip nup amniñg, minj moka giy mindip. <sup>8</sup>Biynuk nup, Gor chech tund ñiñakol giyng mindip bap ñek yimiy, nuñgumiy nup kond mindip angyak.” [Chech tund tep yimb kun ak mey, Gor biynimb suñ-tep nuk gok, nup direp gipay angyi apiyn.]

<sup>9</sup>Pen enjol ak yip angak, “Gor minim nuk niñind yimb angyip ak angen tiknimin. Nuk angyip ‘Biynimb Siypsiyp Ñiluk ak suk angek am nuk yip tap yomb ñiñningambay gok; miñmiñ yimb giniñgambay angyip’ angak.”

<sup>10</sup>Pen enjol ak kun angek, yand tomb angin nup sijak kongim yimiy, nup lotiw giyn angen, yip angak, “Yand Gor mer! Gor nup nep angninimin. Yand yikop bi nup wonj giñemb bap. Nimb Jiysis nup yimb dand aranyiñg, Gor nup direp gipim rek gipiyn. Biynimb Jiysis nup yimb dand aranyak gok, bi Gor minim angek gok, Gor Kawnan ak yip mindiy, nup yimb dand aranimbay rek gipay angak.”

**Krays Kanj Hos Tund Ar Biyoñ Bisgiy Tanjek**

<sup>11</sup>Pen tip ak niñnik: semb biyoñ miñgan yikiy, bi bap kanj hos tund ar ak bisñg mindek. Bi kanj hos ar bisñg mindek kun ak, yimb nuk omiñal: bap niñind, bap chingrep-gip. Nuk biynimb gok kuyip yiwur ñimb ak; monmon ma ñimb, gipay rek niñiy ñimb. Kun ak biynimb gok yip penpen giy ñangjiwip ak, suñ-tep nep mindiy ñangjiwip. <sup>12</sup>Windin nuk ak mon mañlañ rek. Biynimb mangyisek kond mindeniñgamb rek, kiyn aypay arband kuñaynep, jun ar nuk biyoñ ayek mindek. Awinbeñ nuk biyoñ, yimb bap tikayek mindek. Pen yimb nuk kun ak, biynimb yikop gok ma niñbay; nuk nep niñimb. <sup>13</sup>Chech tund ay mindek ak, likañ ak tawek amnak. Pen yimb nuk ak, “Gor minim mangyi won nuk” apay. <sup>14</sup>Amiybi semb biyoñ nimb gok, chech tund teprep yimb gok keykey aydiy, kanj hos tund ar gok keykey nep bisñg diy, nup kindik giyak. <sup>15</sup>Meñg miñgan nuk biyañ, baynat kind yimb bap aranjakak. Baynat kun ak diy, biynimb miñmon keykey ayak rek, kiyk yip penpen gi wiyniy giy, ayen kur par

bap diy, kuyip kond mindeningamb. Pen wiyniym giningamb ñin kun ak, kiyk wayn maŋgiy rek mindey, Gor Biyomb tap okok maŋgiysek gayak ak, nup yiruk yimb gek mey, bi kun ak nup angeningamb, kuyip di Gor wayn maŋgiy tawsimbjakip kiwok miŋgan ak yokiy, tawsimbjakningamb. <sup>16</sup>Pen chech nuk okok sek, miley kind nuk okok sek yimb gunap tikiy aŋgyak, “Biyomb biy mey; bi kiyŋ yomb gok sek, bi yikop gok sek Kiyŋ yomb kiyk ak mindip aŋgyak.”

<sup>17</sup>Pen kisen giningamb rek niŋiy niŋnik: enjol bap pumb windin namb siŋbiyoŋ mindiyŋg, yakir wiŋind taŋgeyak gok kuyip, suk yomb aŋgiy aŋgak, “Gor nimbip keŋmaŋgiy yomb ñining gisap nen, ap nan-giy ñiŋnimimb! <sup>18</sup>Apiy, bi kiyŋ gok kuyip ñimbiiy, amiybi kond mindep yomb gok ñimbiiy, amiybi yikop gok ñimbiiy, kanj hos gok ñimbiiy, bi kanj hos dand tapay gok ñimbiiy ginimimb. Pen biynimb kalambis woŋg gipay gok, yikop mindpay gok, biynimb yimb yomb mindip gok, yimb ma mindip gok maŋgiysek, mumbwak kuyip gok ñiŋningambim aŋgak.”

<sup>19</sup>Pen won ak niŋnik: tap ayndik ak sek, kiyŋ yomb man ar biy gok sek amiybi kiyk gok dap nan-giy aŋgyak, “Bi kanj hos tund dand taŋgip ak yip, amiybi nuk gok yip penpen ginjun aŋgyak.” <sup>20</sup>Kun aŋgyak ak pen, Bi hos tund dand taŋgek ak, tap ayndik ak sek, binuk biynimb gok kuyip tom giyŋg, tap mageprek gak ak sek di, mon maŋlaŋ salpa sek yinimb miŋgan ak yokak. Pen tap ayndik binuk kun ak, nind biynimb kuŋaynep tom gek, tap ayndik kil nup ak diy, tap nup rek niŋiy gayak ak aŋgniyak.

<sup>21</sup>Pen Biyomb kanj hos tund dand taŋgek ak, baynat meŋg miŋgan nuk biyaŋ nimb aranjakak ak diy, amiybi yikop gok kuyip maŋgiysek ñaŋgek, yakir gok apiy, mumbwak kuyip gok ñimb ñimb mer niŋiy kirgiyak.

### Seytan Simiy Wan Tawsin Kalambis Mindeningamb

**20** <sup>1</sup>Pen day niŋiy niŋnik: enjol bap semb biyoŋ nimb sen kilis yimb bol ak diy, kaw miŋgan yomb kiruŋ ma tikak kiywur ak diy, dand owak. <sup>2-3</sup>Dand apiy, ñom nim tom gep wosrey tikiy mindip ak nup chichiy diy, biynimb gok kuyip tip ak tom ma ginimuŋ aŋgiy, tiwning dam kaw miŋgan kun biyaŋ yokiy, kinjeŋ giŋiy, lok girep yimb gak. Gek mey, nuk kun okok kalambis mindek mindek, simiy onep wan tawsin amek, tip ak wisik yokey apiy, sikoy won bap yikop girangeningamb. Ñom nim tom gep kun ak mey, Seytan nep.

<sup>4</sup>Pen niŋnik: Gor aŋgayak biynimb gok ap, biynimb yomb bispay siya ar gok bisŋg mindeyak. Pen biynimb tap ayndik ak nup asikrep giy, kil nup jun biyoŋ akaŋ, ñin maŋgiy kiyk ak ma diy, Gor apiymiŋay kuyip nep chingeyak ñaŋgyak gok niŋnik. Kiyk kim mindiy, Krays yip woŋg giyŋg, biynimb gok kuyip kond mindey mindey, simiy wan tawsin ak yinak. <sup>5</sup>Pen biynimb yikop kumyak gok, ñin namb kun ak

ma tikjakyak. Minim aspiyn biy, Gor gek nind tikjakpay biynimb gok kuyip nep aspiyn. <sup>6</sup>Biynimb nind tikjakpay gok, Gor biynimb suŋ-tep nuk mindiy, tep gakniŋ nep mindeniŋgambay. Tip ak kumiy, miñmon timey ak ma amniŋgambay. Biynimb kun gok: bi Gor nup simboŋgep gok nup direp giyiŋgipay rek giyiŋg, Ñinuk Krays nup direp giyiŋg, nuk yip jimñiy, biynimb gok kuyip kond mindey mindey, simiy wan tawsin ak amniŋgamb.

### Seytan Yiwur Yomb Diniŋgamb

<sup>7</sup>Simiy wan tawsin kun ak amek, Gor enjol nuk gok kuyip aŋgeniŋgamb, Seytan nup kalambis wisik yokey, <sup>8</sup>am biynimb miñmon keykey mindpay rek, kuyip tom giniŋgamb. Biynimb kun gok mey, Goŋg yip Meygoŋg yip. Seytan kuyip gos ñek, penpen giniŋg, kamb kilup ñiŋg solwara gol okok kuŋaynep mindip rek ak winiŋgambay. <sup>9</sup>Tiwin gok tiwin gok apiy, dawin yomb Gor gos niŋimb ak sek, amiy layn nuk gok kuyip sek piŋiy kus kus geyak; mon maŋlaŋ ak semb biyoŋ nimb apiy, kuyip yin simbok amnak. <sup>10</sup>Pen Gor enjol nuk gok, bi biynimb miñmon okok nimb tom giy, lipiŋg dand wak kun ak nup, dam mon maŋlaŋ salpa sek yinimb miŋgan ak diyokyak. Tap ayndik ak yip, binuk biynimb gok kuyip tom giniŋgamb ak yip, nind miŋgan kun biyaŋ am minderik ak mey; yiŋgoŋg giy kawsek, kisyimken meliksek yiwur dinep mindeniŋgambay.

### Kor Yomb Kisen Yimb Ak

<sup>11</sup>Pen siya kiyŋ tund yomb bap niŋiy, bi ar kun ak bisgip ak niŋiy ginik. Biyomb jel gip kun ak awakniŋ, semb biyoŋ sek, man biy sek liŋg key okok amek, tip ak ma niŋnik. <sup>12</sup>Pen biynimb kumyak gok; biynimb yomb gok, biynimb gap gap gok maŋgiysek apiy, kiñiŋ kun siŋak jak mindeyak. Buk kiyk kim mindyiŋg giyak giyak rek niŋiy tikayak gok mikal gay, buk biynimb perper mindeniŋgambay yimb tikyak ak, kisen mikal giyak. Mikal gay, yerer giyak ak niŋyiŋg, kuyip bilokak. <sup>13</sup>Pen Gor biynimb ñiŋg solwara akaŋ akay kumiy, am kor yomb giniŋg kond mindeyak gok maŋgiysek dand apiy, kor kuyip ak niŋiy yerer giyak ak niŋak. <sup>14</sup>Niŋiy, kuyip aŋgyokak mon maŋlaŋ salpa sek yinimb ak. Mon yinimb ambay kun ak mey, tip ak kumbay apun. <sup>15</sup>Pen Gor nuk perper mindeniŋgambay buk biyaŋ niŋ-tep giy, biynimb yimb kuyip ma mindek gok aŋgek, maŋgiysek diyokyak mon key yinŋap kun biyaŋ.

### Mankumb Biy Sek, Semb Biyoŋ Sek Key Kindiknimb Ayak

**21** <sup>1-2</sup>Pen niŋnik: Gor mankumb biy sek, semb kamb biyoŋ sek gek, key kindiknimb ayak. Ñiŋg solwara mindyiŋgip ak, ma mindek. Pen Gor dawin suŋ-tep nuk Jerusalem kisenimb ak, yokek awak. Dawin

kil-tep kun ak, biyn gok bi dining, chech teprep ay kond mindpay rek ak mindek.

<sup>3</sup>Pen siya kiyη mindek namb siηak, suk yomb bap aηgiy aηgak, “Miñiy tikiy, Gor nuk key biynimb gok yip yiηgong giy mindeniηgamb. Kiyk biynimb nuk mindey, nuk kiy yip nep mindeniηgamb. <sup>4</sup>Miñ nindnimb ar ak key mindyiηgipay, miñiy ak pen key yimb mindeniηgambay. Gor kuyip kond mindek, miker ma diy, yiwur ma diy, yikop mindeniηgambay. Biynimb bap ma kumniηgambay. Simb gek, siy ma aηgniηgambay aηgak.”

<sup>5</sup>Pen Bi kiyη siya yomb ar bisgak ak yip aηgak, “Yand apiyn ak mey, nind mindyiηgipim rek ma mindeniηgambim; miñiy kisenimb ar ak mindeniηgambim aηgak.” Kun aηgiy, yip aηgak, “Minim aspiyn ak tikninin. Minim kun ak, minim niηind yimb, biynimb gok pisnep niηiy diniηgiy. <sup>6</sup>Yand Bi tap okok maηgiysek alwol gaynik ak, mindnep mindpiyn. Yerer giniη gos niηnik ak, maηgiysek gi dipiyn. Biynimb an ñiη nen gonimuη, yip ker apey, kuyip ñiη kilam jiwiy apek, ñimb iy perper mindeniηgambay ak, yikop aηgen ñiηniηgambay. <sup>7</sup>Biynimb Seytan miker yimb ñek, pen gos kun ak ma niηiy, yip chingiη nep mindeniηgambay gok; yand Nop kiyk minden, kiy mey ñapan yand gok mindeniηgambay. <sup>8</sup>Pen biynimb Gor nup chingon, chinup miker diniηgamb aηgiy pirikpay gok, biynimb yip gosimb niηsipun aηgiy, Seytan kind okok ambay gok, biynimb tap timey yimb gipay gok, chip ñapay gok, koyimb pikpay gok, tap yikop gok kuyip aηgniηbay gok, biynimb tom ginjun aηgiy niηbay gok maηgiysek; am mindeniηgambay mon maηlaη salpa sek yin mindip ak. Biynimb wikan kun ak ambay gok, ‘Tip ak kumbay’ apun.”

### Jerusalem Kisenimb

<sup>9</sup>Enjol onep ar ak, nind diys kiyk dap lum ar biy soηgiyak gok bap, ap yip aηgak, “Apey, Siypsiyp Niluk ak, biyn nuk dining gisap ak, nip yomiyn aηgak.” <sup>10-11</sup>Kun aηgek, Gor Kawnan ak yip goη ayakniη, enjol ak yip diy, dand miñmon yirik yiy akyoη bap amiy, Gor Jerusalem kisenimb ak yokek owakniη niηnik. Dawin kilrep yomb kun ak ñiñakol aηgiy, kamb kilmenjik tund tep rek ak mindek. <sup>12-13</sup>Wariy paryomb ak gi kus kus giy, kinjeηram onep wimiηgan ak mindek. Kinjeηram kun gok: ayin ar biym omiηal nokom; wisiy ar bineη omiηal nokom; gol bindoη omiηal nokom; gol bindoη omiηal nokom. Pen enjol onep wimiηgan ak, kinjeηram kun gok keykey kond mindeyak. Kinjeηrumb kun gok, day ar biyoη Jiwdakiñiη keykey onep wimiηgan ak mindpay rek, yimb kuyip gok tikayak. <sup>14</sup>Pen wariy kun ak nind gayniη, kamb paryomb onep wimiηgan ak parsek ay ay diy, kisen wariy giyak ar kun ak. Kamb par kun gok, bi Siypsiyp Niluk minim dand amemb onep wimiηgan ak, yimb kuyip gok tikyak.



<sup>15</sup>Enjol yip minim anggak ak; dawin yomb kisenimb ak sek, wariy kus kus gak ak sek, kinjenram gok sek ayniņning, yir gol diy giyak bap di mindek. <sup>16</sup>Pen nuk yir kun ak diy, dawin nonim ak ayniņek, niņnik: biym nimb binej tiwelip tawsin amnak; bindoņ nimb bindoņ tiwelip tawsin amnak. Pen kiyonņiy key ma mindek, andip andip kun ak nep mindek. <sup>17</sup>Nuk dawin yomb wariy kus kus gak ak, biynimb yir ay űin paņņiņbay rek, lum biyaņ nimb day ar biyoņ ayniņek; wan handret powtiy-pow amnak. <sup>18</sup>Wariy kun ak, kamb kilmenjik ak diy gayak. Dawin yomb ak, gol teprep galas rek kind aņņiy mindek gok nep diy gayak. <sup>19</sup>Kamb paryomb wariy kiņiņ biyaņ mindek gok, kamb teprep maniy yomb tawpay keykey onep wimiņgan ak, gayek mindek. Day biyaņ kamb kilmenjik ak gayak; namb ar ak kamb muk ‘saphaya’ ak gayak; namb ar koyoņ ak kamb tund ‘aget’ ak gayak; tiņgawip ak kamb minjikimemb, ‘Emerel’ ak gayak; <sup>20</sup>mamind ak kamb likaņ sek, tund sek yingonņ gak ‘sandonykis’ ak gayak; kangol ak kamb likaņ ‘konliyan’ ak gayak. Pen ar ak kamb walın ‘kriysolayt’ ak gayak; jiy ak kamb minjikimemb ‘beril’ ak gayak; anjip ak kamb walın key yimb ‘topas’ ak gayak; wanjrem ak kamb minjikimemb sek, walın sek yingonņ gak ‘kriysopres’ ak gayak; aņņip ak kamb muk key yimb ‘hayasin’ ak gayak; wimiņgan ak kamb likaņ am-yimb ‘ametiys’ ak gayak. <sup>21</sup>Kinjenrumb onep wimiņgan yikyak gok, kumbap rek onep wimiņgan ak diy gayak. Dawin yomb kun ak, lor gok gol tep tep diy gayak ak mey, galas rek kind yimb aņņiy mindek. <sup>22</sup>Pen Gor Biyomb tap maņņiysek alwol gayak ak sek, Siypsiyp űiluk ak sek mindpiyr rek, dawin yomb kun ak, Gor aņņiņep korip bap ma mindip. <sup>23</sup>Pen Gor apiymiņay melik yimb mindpiyr rek, pumb takin woņņ bap ma mindip. <sup>24</sup>Biynimb miņmon keykey gok, dawin yomb kun ak, sup melik tep ak niņyiņ taņņeniņgambay. Kiyņ keykey gok, tap teprep kiyk mindeniņgamb gok, dand miņgan kun ak amniņgambay. <sup>25</sup>Pen dawin yomb kun ak, kisyim ma winiņgamb; kinjen gok ma giņiņiņgambay. Minek minek yikiy nep mindeniņgamb. <sup>26</sup>Biynimb miņmon keykey gok, tap teprep dawin kun ak yimb dand aranemb gok, dand miņgan kun ak amniņgambay. <sup>27</sup>Gor tap asikip gok, miņgan kun ak amniņgiy rek ma mindip. Miņ tom gipay gok, Gor kuyip niņek nambiņ diniņgiy rek gipay gok, miņgan kun ak ma amniņgambay; Siypsiyp űiluk biynimb nuk perper mindeniņgambay aņņiy yimb kuyip tikayak gok nep aņņek, miņgan kun ak amniņgambay.

### űiņņ űimbiy Perper Mindeniņgambay Ak

**22** <sup>1</sup>Enjol kun ak, yip űiņņ tund teprep űimbiy, perper mindeniņgambay ak yomek niņnik. űiņņ kun ak, Gor yip, Siypsiyp űiluk ak yip siya kiyņ kiyk apiymiņay bisgipiyr siņak nimb kilam jiwiy, <sup>2</sup>dawin yomb lor namb ak apiy amnak. űiņņ gol pis pis mon



ñimbiy, perper mindeningambay gok jakak. Mon bind kun gok, simiy nokom nokom takin keykey anep wimingan ak, maŋgiy piyip. Pen mon kas kun ak, biynimb miñmon keykey gok kuyip, gek suŋ aynimuŋ rek nep mindip.

<sup>3-4</sup>Dawin yomb kun ak, biynimb asiŋ gok mindeningiy rek ma ayip. Gor yip, Siypsiyp Ñiluk ak yip siya kiŋ kiyk apiyminay ak, dawin yomb namb siŋak ay bisinŋ mindrikniŋ, biynimb gok jomluk kuyip apiyminay niŋyinŋ, lotiw giyinŋ yimb dand araningambay. Siypsiyp Ñiluk yimb nup ak, awinbeŋ kuyip biyoŋ tikayey mindeningamb. <sup>5</sup>Kisyim ma wininŋamb. Pen pumb yip, lam yip biynimb gok kuyip, melik yomimb rek ma yomningamb; Gor Biyomb yimb ak melik kiyk ak mindakniŋ, kiyk perper kiŋ rek mindeningambay.

### Jiysis Maŋ Mindip Winingamb!

<sup>6</sup>Pen enjol ak yip aŋgak, “Minim aspiyn kun ak minim yesek mer: niŋind yimb. Niŋiy dininŋiy. Gor Biyomb, Kawnan nuk bi minim nup aŋgep gok, gos ñek minim aŋgyinŋipay ak nep, yip yokek apiy, biynimb Gor nup direp gipim gok, maŋ mindip giningamb minim ak aŋgimbiyn aŋgak.”

<sup>7</sup>“Niŋim! Maŋ mindip niningayn. Biynimb an minim aŋgip biy kisen giningambay gok, Gor gek miñmiñ giningambay aŋgak.”

<sup>8</sup>Yand Jon, tap gak kun gok sek, enjol minim aŋgak kun gok sek niŋdiyinŋ; apyap tomb aŋgin nup siŋak koŋgim yimiy, nup lotiw giyn aŋgen; <sup>9</sup>yip aŋgak, “Mer! Yip kun ma ginimin; Gor nup nep aŋgniŋnimin. Yand bi yikop nup woŋg giñimbiyn. Nimb biynimb minim mindip buk biy kisen gipim gok sek, namam Gor nup minim aŋgep gok sek Gor nup direp gipim rek gipiyn aŋgak.”

<sup>10</sup>Pen yip aŋgak, “Kisen giningamb minim tikpan kayan ak, ma weyinŋ chichiy ginimin. Yenen: maŋ mindip, minim tikpan rek maŋgiyseŋ giningamb. <sup>11</sup>Kun ak nen, biynimb timey gipay gok, timey ar ak nep gi mindeningiy; biynimb tep gipay gok, tep ar ak nep gi mindeningiy. Biynimb tap siy tap timey giy, asiŋ mindpay gok, asiŋ nep mindeningiy; biynimb suŋ-tep mindpay gok, suŋ-tep nep mindeningiy aŋgak.”

<sup>12-13</sup>Jiysis aŋgip, “Niŋim! Yand mey, Bi siŋok kiñiŋ giy mindiy, mind dand apiy, mindnep mindeningayn. Junj yand nep; piñ ak yand nep mindpiyn. Maŋ mindip niningayn. Ñin kun ak, nimb biynimb yand gok yip yerip yerip gipim rek niŋay, pen kunep direp yimb giningayn. Yand Bi kiñiŋ giy mindiy, mind dand apiy mindnep mindeningayn. Junj ak yand nep; piñ ak yand nep mindpiyn.

<sup>14</sup>“Biynimb chech kiyk ñinŋ pikrep yimb giy mindeningambay gok, miñmiñ giningiy. Mon maŋgiy ñimbiy perper mindeningambay ak ñor ñimbiy, am dawin yomb suŋ-tep miŋgan ak sikiy amningambay. <sup>15</sup>Pen

kayn ayndik gok, dawin suŋ-tep kun ak amniŋgiy rek ma ayip. Biynimb kunj gipay gok, biyn siy bi siy gipay gok, tap timey gipay gok, chip ñapay gok, tap yikop okok gor chin aŋgiy aŋgniŋbay gok, tom gun aŋgiy niŋbay gok mis biyaŋ nep mindeniŋgambay.

<sup>16</sup>“Yand Jiysis, enjol yand ak aŋgyoken, am nimbip biynimb miñmon keykey yip chiŋgipim gok, minim aŋgñimb. Yand bi siŋok, Depiyt tik dand amiy tikey, Biyomb mindeniŋgamb aŋgyak ak nep. Yand mey, gap poŋglin yomb miñmon yowniŋ gakniŋ, aranjakniŋgamb aŋgyak ak mindpiyn.”

<sup>17</sup>Pen biyn siŋok, Bi yand ak, yip pisnep diy dand amniŋgamb aŋgip ak sek, Gor Kawnan ak sek ‘Winimin!’ apiyr.

Biynimb minim kun biy niŋiy diniŋgiy gok kunep, ‘Winimin!’ aŋgniŋgiy.

Nimbip biynimb kuŋam kinjik gek mindpim gok, maŋgiysek wim! Apiy, ñiŋ ñimbiy perper mindeniŋgambay ak, yikop diy ñiŋnimimb.

<sup>18</sup>Nimb biynimb minim kun biy aŋgey niŋnimimb gok, niŋrep ginimimb. Biynimb minim kun biy niŋiy, minim yesek gunap sesek yiŋgoŋ geniŋgambay; Gor pen gek, miker yomb aŋgip gok kuyip diniŋgamb. <sup>19</sup>Pen biynimb minim kun guniy, day gunap ma niŋjun aŋgiy kirgeniŋgambay, Gor kuyip pen mon maŋgiy ñimbiy perper mindeniŋgiy aŋgip ak ma ñiy, dawin suŋ-tep perper mindeniŋgambay ak sek mer aŋgek, ma amniŋgambay.

<sup>20</sup>Bi minim biy niŋind nep tikip aŋgiy niŋimb ak aŋgip, “Yaw! Maŋ mindip niniŋgayn aŋgip.”

Biyomb Jiysis! Apan kun ak niŋind apan! Kasek winimin!

<sup>21</sup>Biyomb chin Jiysis nimbip, Gor biynimb nuk gok, mapin diyiŋ nep mindonimuŋ. Tep.